

南澗甲乙稿
附拾遺

二



1180



南 澗 甲 乙 稿

附 拾 遺

(二)

J
178
1.1980

韓 元 吉 撰

南澗甲乙稿卷六

五言絕句

遺直堂六首

蒿萊自與臺松桂。猶伯叔便合追孔林。無庸號寒木。
虬龍舞雲端。風雨來海上。尙想堂中人。詩成一迴向。
苦心有深思。勁質無軟語。賢科廢因公。此事亙千古。
種木已如此。高賢有餘思。賴公酷似舅。其誰羨牢之。
鄭虔骨已朽。孔父天不遺。他年從事賢。手板空倒持。
棟梁乃不取。得地且深植。妖嬈紫薇花。歲晚猶伴直。

夜宿斜溪聞杜鵑

解攬山銜日。移舟雨暗溪。無情子規鳥。夢斷隔林啼。

送龐祐甫五首

燕鴻望南飛。春至還北去。託食波浪中。瀟湘幾回渡。

遊子思故鄉。天涯兩相逢。時平甘卹緯。定交各塗窮。
濯濯機中絲。粲粲錦繡段。自非同心人。千金孰肯換。
江湖多青山。舟楫長往還。山色難送客。不如住山閒。
中宵權謳發。菰蒲翳明月。月黑君忽行。恐墮蛟龍窟。

六言絕句

題日出雨腳圖二首

絕壑春林映綠。半山曉霧迷紅。長憶西巖夢覺。小舟欸乃聲中。
隱隱遙分樹色。蕭蕭似聽風聲。何處江傾海墮。隔山霧白煙明。

次韻趙公直題米元暉畫軸

天際歸雲挾雨。江千亂木藏山。耳冷似聽蕭瑟。眼明驚見孱顏。

七言絕句

春雪得小詩五首且約客登賞心亭

東臆坐愛枝間雪。大似醱醑壓架花。天氣更晴宜有月。夜深來看玉交加。

淮南山色一千里。落水層城江更湍。何地江山有如許。與君聊趁雪中看。
臘前未見梅如雪。春到還驚雪似梅。可是天公有情思。便令花樹一時開。
江南絕景賞心亭。臥雪難尋舊畫屏。白鷺洲前夜來雪。故應此畫勝丹青。
竹爐聽雪坐蒲團。長笑詩人不耐寒。未辦貂裘走南陌。肯來高處一憑欄。

夜雪

爐火深紅蠟炬明。打牕風雪正縱橫。瓦瓶旋注山泉滿。卻作瀟瀟細雨聲。
伴眼文書細作行。昏昏愁臥雪穿廊。何人恰弄風前笛。錯認梅花到枕傍。

詠晴

愁眼東西萬里情。山雲斜度水風清。客行歲晚忽春盡。看到枯林綠葉成。

春日書事五首

十年騎馬聽朝雞。老竊州符簿領迷。衙鼓不聞春睡足。閉門聊喜得幽棲。
曉猿夜鶴寂無聲。春至山禽百種鳴。步繞新泉聊洗耳。由來心與地俱清。所居山下得泉甚異。
極目亭邊花定開。野棠山杏手親栽。春風拂檻知何似。應記劉郎兩度來。
憶上金華第一峯。相君官重酒樽同。夢尋絕壑誰重到。零落山桃小院風。
溪邊亂石蛟鼉臥。煙裏千花錦繡圍。記得年時作寒食。山橋吹笛雨中歸。山橋金華山勝處。

晨興

北牕松竹夜蕭騷。詩就呼兒進濁醪。睡美不知新雨足。曉來南澗水聲高。

聽雨

呀軋籃輿不計肩。五更殘夢尙悠然。紅油蓋重聽朝雨。卻似西江坐釣船。

題張幾仲所藏醉道士圖

何須坐客總能文。呼酒相逢日暮雲。醉倒儘如狂道士。夜歸誰問故將軍。
幾仲移節稽山。淳熙庚子歲除前一日。會飲上饒傳舍。觀圖。戲書南澗翁韓某無咎。

浙江觀潮

江翻海涌勢難平。鼉擲鵬拳自不停。端爲君王洗兵馬。參旗井鉞萬雷霆。

大湖秋晚

片帆幾日下西風。湖色秋容暮靄中。買得鱸魚弔張翰。臥聽欸乃度垂虹。

海門斜照

雲夢懸知八九吞。銀山萬疊漲天門。長江日落魚龍舞。古寺煙深鳥雀喧。

武昌春色

樊山宮殿已成陳。煙雨陰晴到處春。花柳不知興廢事。隔江相倚鬪時新。

七夕

銀河翻浪拍空流。玉女停梭清露秋。天上一年真一日。人間風月自生愁。

秋懷十首

朝行佛屋魚千里。暮借僧牀鷓一枝。牕下秋蟲解人意。似憐羈客伴哦詩。
酒熟橙黃盛物華。重陽無客不思家。鵝兒剪雪開巖桂。鶴羽攢金散菊花。
小雨驚秋滴夜闌。晴雲和日曉斑斑。誰憐客舍塵埃底。猶得西湖一兩山。
何許砧聲清夢回。丁東猶作珮環猜。卷簾風露涼如水。端爲嫦娥向此來。
城外秋荷一半黃。尙餘疎柳照回塘。江南底許風光好。塞鴈來時未有霜。
右手持杯左不空。蟹螯已作雪蒙茸。秋風莫起鱸魚夢。未似先生阿堵中。
八月濤頭舊有名。今年潮淺岸纔平。應緣享帝千靈在。豫使魚龍不敢鳴。
塞草初黃邊馬肥。邊塵莫便向南飛。江頭鶴唳秋風起。看取陰山六騎歸。
江南四百八十寺。未抵西湖勝處多。不用樓臺帶煙雨。只看宮殿壓晴波。
閉戶跣趺意已清。爐香燒盡一燈明。空庭葉落知多少。一任西風百種聲。

聖政更新詔書正告許之罪因得小詩十首〔案〕通鑑續編紹興二十五年十月。秦檜死。黜檜姻黨。

十一月。釋趙汾及李孟堅。王之奇等自便。十二月。復張浚。胡寅。張九成等二十九人官。徙李光。胡銍。

于近州二十六年正月。追復趙鼎。鄭剛中等官。此詩所謂十年言路皆支黨。雷州司戶卻生回。衛公精爽故依然。皆記其事。謹附識。

惡復凶終事久知。豈知聖斷不踰時。小儒未歎周南滯。但喜逢人敢說詩。
桓溫將死謝安起。霍氏初除魏相來。誰與聖君安大業。巍巍廊廟可無材。
聖朝遂失誅元載。公議猶能去霍山。落膽徒聞溫御史。不知睿意在羣奸。
元祐諸公秉國均。詔條先請惠吾民。孤雛腐鼠何勞逐。準擬朝廷政事新。
金貂七葉誰能必。石槲三年計自愚。得鹿覆蕉真一夢。求魚緣木信狂圖。
獻可爭先詆荆國。瑩中居首論蒲陽。十年言路皆支黨。前無一語譏安昌。支黨用詔語。
近聞羔鴈已成羣。藻鑿渠能涇渭分。急士且須侯雍齒。得賢端可吏朱雲。
刺字幾漫冠欲塵。向來浮薄自紛紛。爾曹胸次多周孔。忍作銅山破賊文。
荆棘誰令滿路栽。雷州司戶卻生回。獨憐陽陸真天命。不見承平公道開。
潮陽初謫八千里。中令俄成十九年。地下修文應泚筆。衛公精爽故依然。

臥病

有身自覺皆爲患。了事從來卻號癡。貧裏定知強健樂。未妨斗酒百篇詩。

夜宿青陽旅舍起觀林端積雪半消疑山磬盛開

風卷千林夜雪晴。九華山下月微明。不須更覓唐昌藥。樹樹瓊瑤玉刻成。

去草

永日荒園獨荷鋤。草根藤蔓喜無餘。誰憐仲舉平生志。卻學齊民種樹書。

偶興四首

桂花飄盡菊花黃。閑對芳叢靜愛香。堂下草深須一丈。會看春意滿池塘。

小園無數菊花開。準擬花殘便見梅。不恨無花正無酒。敲門誰送一樽來。時有遠客惠酒。

江南菊少開金色。只有霜葩雜御黃。乞得黃花真愛惜。明年臙種壓羣芳。

愛水仙成百計栽。三年一笑漸能開。金銀豈是吾家物。借我虛名付酒臺。世言水仙一移。三年乃開。

市人有弄虎者兒輩請觀飼以豚蹄觀其攫噬戲作四絕句

眈眈出柙小於菟。猶意他年見畫圖。養汝由來得無患。卻驚赤手競編鬚。
呀然一嘯朔風生。兒女窺簾笑且驚。檻內應憐只搖尾。山中不記舊橫行。
長年肉食定何功。乞汝豚蹄且慰窮。猿臂將軍應老矣。南山忽憶夜彎弓。
熒熒目色爲生寒。蠻獠歌呼意自閒。莫倚便能探虎穴。勢卑還長越王炎。

俸金既盡家人問所質物戲答

十載棲遲榻具客。一生憔悴屢屢歌。典衣不爲沽春酒。平昔無詩博飯籩。

讀周瑜傳

年來三十過平頭。笑卻周郎卻自羞。但得小喬歌一曲。未須辛苦向荊州。

乘潮遇順風

忠信平生自可期。江神于我定相知。順風鼓棹潮如席。世事由來卻險巇。

山行二首

晴日烘林百草香。杖藜徐步興何長。殘花的皜明幽徑。老笋參差出斷牆。春來南澗水初生。鷗鳥逢人自不驚。步繞幽花隨樹歇。望尋高柳趁隄行。

行泮渠中

東海桑田未可期。隋河高岸已鋤犁。樓船錦纜知無地。枯柳黃塵但古隄。

剡溪道中五首

擬賦歸田未有田。春風聊泛剡溪船。青山滿眼留儂住。處士茅茨阿那邊。戴家家住此溪頭。買酒尋春得勝遊。夾岸楊花渾似雪。不應興盡便迴舟。平潮恰恰亂蛙鳴。斷送江南春雨晴。綠澗細看桑眼破。紫茸還見草心生。心隨天末江波遠。愁似沙津柳帶長。向晚飛花度牆影。半晴煙雨發山光。抱琴不作王門客。晉代高風只此人。放老底須三上疏。竹林諸子未天真。

隱靜山二首 乾道戊子七月旦日題。

山鎖松行一逕遙。峰迴樓殿更嵒曉。飛來雙鶴知何處。只有泉聲下碧霄。
海上蟠桃手自栽。紅塵一墮隔蓬萊。風帆弱水無由到。乞我當年渡海杯。

狼山

天外奇峰認九華。路人指點是狼牙。他年刻石題車馬。曾遣山前屬漢家。

初見龜山塔

煙裏微茫第一山。眼明白塔俯滄灣。塵埃滿面三千里。一笑相看似夢間。

山口道中

芳草連雲水拍溪。春山樹樹子規啼。東風何事催行客。偏遣殘紅趁馬蹄。

望靈壽致拜祖塋

白馬岡前眼漸開。黃龍府外首空回。慇懃父老如相識。只問天兵早晚來。

宿石橋聞水聲

野橋曲折渡千回。古寺懸知水面開。一夜寒聲喧客枕。卻疑風雨轉山來。

洞溪絕句三首

桃李欲開天雨雪。二月山城無奈寒。賴爾狐裘來送質。更須樽酒放愁寬。

杏花無數連村落。也有人家掛酒旗。春色撩人只供醉。卻怕風吹易醒時。
溪流直傍長堤去。繚亂半山桃李花。極知渡口好春色。卻下扁舟步晚沙。

西湖絕句戲題

淺白深紅叢樹花。波光浮動竹交斜。怪來詩思清人骨。知是西湖處士家。
流水當階山對門。擬尋茅屋住荒村。誰憐九里松間路。猶有人間市井喧。
人道西湖一曲屏。只應真色畫難成。柳隄竹塢無窮意。更著荷花百媚生。

渡河有感

袞袞河流到底黃。誰言一葦便能杭。傷心擊楫無人會。舉酒回頭醉太行。

同翁子功之平江午憩涵山淨慈寺

蘋花吹盡藕花香。日落風生水面涼。淨洗扁舟載明月。共君長嘯飲湖光。

曇花亭供茶戲作二首

問訊高真此住家。伊蒲未辦且煎茶。故應一笑來迎我。五百瓶中總是花。

一聲鐘磬有無中。樓閣山林本自空。不向雲端呈伎倆。猶來盞裏現神通。
是夕始聞鐘聲。而金燈不現。

夜宿玉虛宮小軒正對步虛峯道士云天寶二年有慶雲見且山呼萬歲始詔建黃帝祠封爲仙都

山敕書今亡

檻外風高霜月明。步虛山裏步虛聲。罷琴刻燭初長夜。又得人間一夢清。
封禪空餘不死名。華清宮裏望長生。閒雲強作人間瑞。更有山呼萬歲聲。
龍虎驅馳戰阪泉。荆山鼎就更昇天。軒轅到處存遺跡。忍使君王不學仙。

溪山堂次韻

溪岸人家高下居。繞溪雲樹雜煙蕪。故應曲水傳佳句。還喜青松入畫圖。

又溪山堂次韻四首

堂前松竹挺千軍。堂外青山萬馬羣。橫策時來按文陣。要須筆力起風雲。
漱漱溪光白鳥前。昏昏雨腳暮雲邊。一年風景君應記。五月來看競渡船。
九衢塵土鬢毛蒼。只有溪山意味長。但得楓林供欸乃。猶勝斗酒博伊涼。
梅子青青杏子紅。繞城荷葉已掀風。莫嫌春盡無花柳。猶得清樽阿堵中。

紫極觀二首

小雨輕雲卻解晴。菰蒲衝浪過船聲。已無桃李占春事。濃綠滿山風更清。
楊柳花飛杏子新。園林無地可留春。卻尋風雨江邊路。慚愧煙霞物外人。

漢光武廟

涿郡漁陽此路分。用兵諸將總如神。白頭浪說關中事。鄧禹當年已笑人。

賀子忱抱漆庵二首

紫橐光華穩致身。會看功業上麒麟。丈人久悞人間世。莫忘他年慧帳春。
紅覆薰籠錦不如。萬株相倚占春餘。小牕睡足花陰裏。何似天香下玉除。

釣臺

瑣溪亦有釣魚人。一笑鷹揚掃戰塵。不會先生辭漢祖。投竿深坐此江濱。

答人問易

陰陽妙用表三才。卻問陰陽底許來。若識陰陽由動靜。何人更作有無猜。

鐵鏡贈仲儼

石門江畔鴈山前。芥室遙知更豁然。百鍊精明真是鐵。不妨照破野狐禪。

明老惠炭戲以二小詩

雪裏難逢送炭人。地爐炙手便生春。酸寒東野真堪笑。解道曲身成直身。
道人作喜每逢場。一束烏薪發電光。便使樽前化紅袖。不妨笑殺許旌陽。

訪吳元鼎如村五首

野竹漫山水漫門。未離城市卻如村。何須更問柴桑陌。三徑雖寒菊尚存。
我住城南君在西。柴門草長與人齊。不妨共踏溪津路。日日雲山入杖藜。

經句泥潦路難乾。煙鼻長林雨暗山。常笑詩人愁屋漏。卻思寒士與千間。
昔年曾歎馬相如。才氣飄飄賦子虛。未怪家貧徒四壁。先生四壁儼人居。
我生甲子幸君同。君自臞仙我秃翁。要拍銅鞮論歲月。莫嫌相對只詩窮。
史十伯強浮沈市廛。自號道人而筆力議論不可掩。抑豈隱者耶。觀其詩卷。贈以絕句二首。
未容君識得君詩。添我幽栖一段奇。會有吹噓天上去。沈香亭北要新詞。
頭上塵冠豈易彈。匣中長劍篋中丹。放懷風月真餘事。好向朝廷策治安。

次韻李平叔直舍竹二絕句

寒梢到地不肯屈。迸筍出簷還作行。故應餘韻占風月。要自勁節含冰霜。
詩翁愛竹有佳句。詩就移官可奈何。密葉歲寒應更好。臘來和雪看婆娑。

姜特立寄詩編爲賦四首

十年文場未奏功。鷗冠一笑且春容。遙知橫槩荻蘆岸。海闊蛟鼉赴筆鋒。
少年耽句千篇在。老境忘言半偈無。失喜因君還絕倒。但驚寒雀費隋珠。
榕葉青青荔子紅。三山十寺粵王宮。誦君好句渾如畫。寄我清遊夢想中。
宗景文爲工學問。賀方回亦擅詩歌。半山人去東坡沒。妙墨空嗟楮上磨。

重午齋宿讀蔡迨文編以酒饋之

長安米賤不難居。玉署金閨有直廬。指日君王嗟見晚。凌雲誰似馬相如。
沈香亭上未傳宣。斗酒揮毫自百篇。研雪新蒲甌弄碧。遙知獨酌意悠然。

九日送酒與朱元晦

平生愛酒陶元亮。曾繞東籬望白衣。底事秋來猶止酒。重陽須插菊花歸。
老大相望寄一州。故人鄙我倦追遊。應知命駕無千里。惆悵山堂暮雨秋。

航弟自廣潤省墳金華作二絕句送之

族緒彫零不計年。戶曹一眷更蕭然。恨無收斂冠巾計。送汝安心穩坐禪。
烏玄鵠白從來事。兔角龜毛本自無。日用不知何許是。漫言實相與空虛。

送沈信臣赴試南宮五首

山城寒陟夜飛霜。楓葉青紅帶夕陽。夾道梅花有春色。不妨衝雪到錢塘。
僕射吳興自世家。迺翁勳業著金華。似聞玉座詢名字。會伏青蒲掌白麻。
共踏槐花記昔年。一彎新月夜移船。君行爲問靈泉水。夢到松林石壁前。
漫仕雖同官事殊。故人來往未全疎。因君時一論文字。難我窮年困簿書。
吾謀不用可無人。小技文章亦有神。一第區區兒戲耳。請君折取桂爲薪。

次韻石林見貽絕句四首

平昔勳名步玉除。碧油幢下見懸車。定知他日平泉記。不數當年種樹書。
敢從州縣歎徒勞。斗米真成費束蒿。一醉石林巖下月。世間無復武陵桃。
青山白水對開簾。佳句中邊勝蜜甜。機杼由來千丈錦。區區割截笑江淹。
先生德業萬人雄。尋尺猶收爨下桐。乞與朱絃弄流水。坐聽巖壑起松風。

次韻沈明遠春盡書事

街槐園柳綠初連。花盡春歸思黯然。密葉鳴琴清夢斷。白雲雙眼暮山前。

次韻子雲春日雜興五首

馬上還逢江上春。冷煙和雨作紅塵。不堪柳絮催行客。也有桃花似故人。
鷓鴣鳴時春事空。菰蒲葉小未成叢。已拚江草無情綠。不奈山花恣意紅。
瓦盆傾酒未全貧。歲歲田家肯負春。不恨酒醒花落去。花開酒盡最愁人。
綠陰池沼亂鶯流。眼底春來鬢卻秋。不用黃金買白日。待尋三徑作歸休。
山如眉綠畫新就。江似蒲萄始潑醅。收拾風光付佳句。此行嗟我未空回。

又次韻子雲春日絕句三首

亂離誰意有新春。共醉春盤能幾人。但道沙場無匹馬。便驚羅綺總爭新。
春來殘雪自消簷。只有愁人鬢雪添。未省雙鞬談豹略。且聽紅袖唱香奩。

日月行天自漢家。十年京洛恨無涯。兒童不識鄉園事。競說江南春後花。

次韻子雲寄楊仙姑酒絕句二首

海上冰漿冠八州。舊傳仙姥下層樓。一樽壓倒長安市。白墮青春未解愁。
蒲萄底用博涼州。有酒逢秋更上樓。留取楊家風味客。對牀來此話離愁。

次韻子雲中秋見寄二首

風雨經時憶對眠。秋聲愁絕雁橫天。未應放卻西樓月。得酒寧須問聖賢。
水繞孤城意自由。遠山無數鬱相繆。月明又作中秋好。白髮相望在兩州。

次權歌韻

宛宛溪流九曲灣。山猿時下鳥關關。釣磯茶竈山中樂。大隱蒼屏日月閒。

次韻趙文鼎同遊鵝石五首

綠繞雲山溪水南。溪光溶漾滴晴嵐。不知日暖花爭豔。但覺風和酒易酣。
桃花臨水喚人看。花在嶙峋翠石間。莫惜持杯酬爛漫。更須扶杖俯潺湲。
長憶湖山天意新。詔恩大尹宴羣臣。休尋輦轂紛華夢。且作林泉自在人。
漱漱煙波帶月華。渡頭江迴兩三家。細傾社壺鵝兒酒。共聽山村楊白花。是日吐。
幾年家住玉溪頭。乘興時來上釣舟。古寺幽情未曾到。尋春一爲野僧留。

入冬苦雨。晴幸應。劉若訥惠詩爲賀。因次其韻。

雨餘雲杪澹疎星。老病窺簾眼自明。農事已知今歲好。天公曠放十分晴。
酒難忘處能消日。雨不愁時任戴星。欲和新詩無好語。竹牕燈火夜晶熒。
燈花作喜夜來占。樓角初晴月似鑿。使說市亭新酒美。好風寒日舞青帘。
麥田秋過未休工。糴極如雲白雨中。乞得晴明三十日。披襟可詠快哉風。

次韻鄭守舜舉喜雪四首

好雪相仍歲又除。豐年瑞事總堪書。未嫌款段追千騎。化作張仙跨白驢。
使君仙骨迥無儔。合上瓊樓倒玉舟。雪裏漁簑詩更好。盛傳僧舍與歌樓。
銀似豪家沒奈何。玉成高壘更巍峩。殘年共擬看三白。酌我從今未厭多。
湘吳醇酎愜兼衣。多病難禁玉笋飛。月下更期看國豔。凌波那更舞江妃。

鄭守用前韻見示因亦和答四首

臘裏三看雪滿衢。使君當奉十行書。先生履敝人應笑。泥滑東家許借驢。
九陌歌呼屬後遊。一簑風景付漁舟。相逢且向南溪看。玉作靈山高石樓。
振塵糜金氣自和。政聲誰爲勸嗟峩。牛羊壠上飢民絕。鵝鴨池邊勇士多。
天巧由來不露機。冰漸剪出萬花飛。瓊瑤似識漢川女。瑤瑟更逢湘浦妃。

次韻務觀城西書事二首

臘盡雪晴春欲柔。濛濛烟柳認瓜洲。
潮生潮落無窮事。江水東西不限愁。
川搖百艇陸千車。多是淮南避地家。
黃紙赦來戎馬去。兒歌婦笑搗叻啜。

次韻王季夷時同宿蔣山

北山應見太清年。興廢由來亦偶然。
自我得之還自失。老禪刀尺尙相連。
草堂一壑轉山腰。杖策無因隱士招。
慧帳只應容我老。冷猿孤鶴夜寥寥。
當年丞相讀書林。誰識更張萬事心。
壘上牛羊共回首。插天喬木暮陰陰。

墨梅二首

西北佳人絕代姿。傾城傾國未爲奇。
自然冰雪生顏色。不用人間朱粉施。
影落寒塘月照時。夢爲蝴蝶繞高枝。
畫工欲畫無窮意。不道幽人賸得知。

栽梅

人將粧額半凌晨。天與仙風自絕塵。
歲晚相逢有如此。爲君傳取雪中真。

暉仲惠梅花數枝

霜餘不用怨年華。已有寒梅一兩花。
眼冷故知春意動。瓦餅終日看橫斜。
莫問南枝與北枝。香幽先與小春期。
直從的皜寒梢數。看到飄零似雪時。

江上春風幾日回。一枝先傍小堂開。恨無冷豔連天白。已有生香特地來。牘買青春不費錢。眼明江靜月爭妍。詩人每負梅花債。屈指今年第一篇。

蠟梅二首

白壁黃金取意裁。極知變態自江梅。風流一樣香仍好。共趁春前臘後開。未恹籬東染御黃。天香特地剪蜂房。應憐雪裏昭君怨。洗盡鉛華試佛粧。

燕山道中見桃花

今日風橫車少塵。卷帷聊看塞垣春。已驚漠漠花經眼。也有濛濛絮撲人。去歲得黔江縣牡丹數種。今年開一枝。蓋白者譜中所謂水晶毬也。黔江新濛水晶毬。冰雪肌香體更柔。彈壓風光知第一。醪醺玉藥見應羞。

汴都至南京食櫻桃

銀盤日日飽朱櫻。不負歸轅過兩京。身到江南梅未熟。故園風味夢關情。

以雙蓮戲韓子師

雨洗風梳兩鬢新。凌波微步襪生塵。眞成紅玉嬌相倚。不減昭陽第一人。並舞連歌意態新。水晶宮裏向無塵。一時風月誰能許。要是君家兩玉人。

種竹

香苞吹盡翠成圍。牆角蕭蕭一徑微。已喜軒牕無俗韻。更憐風月有清輝。

謝陳秀才送詩

偶因借得官書讀。小札于君一向疎。忽寄江湖詩百紙。梅花擔上雪晴初。

用梁士衡韻還鄧器先道中詩卷

夢繞江南雲水鄉。麻姑壇下月如霜。風光景色一千里。都在君家古錦囊。

悼老瓊二首

歌舞相從六換年。秦箏已斷不能絃。荷花滿眼垂楊綠。腸斷清宵月正圓。
江水東流湖水西。水邊花落夢回時。南屏山下風吹土。猶作蕭蕭暮雨垂。

紙鳶

排風決起鬧羣兒。勢力由來一線微。天上鷓鴣徒似耳。卻驚遮日傍雲飛。

廬山霽色

山北山南佛寺開。煙銷日出更崔嵬。讀書誰伴謫仙老。沽酒要須陶令來。

靈隱冷泉

山涵水影兩空明。水到山前百尺清。洞裏臞仙應一笑。抱琴時爲寫寒聲。

南澗甲乙稿卷七

詞

點絳脣 十月桃花

木落霜濃探春只道梅花未嫩紅相倚灼灼新粧賦。莫問仙源且問花前事。休辭醉想君園總是生春地。

浣溪沙 次韻曾吉甫席上

莫惜清樽領客同。已無花伴舞衣紅。強歌歸去莫怱怱。細雨弄煙煙弄日。斷雲粘水水粘空。酸醞飛下晚來風。

霜天曉角 蛾眉亭

倚天絕壁直下江千尺。天際兩蛾凝黛。愁與恨幾時極。怒潮風正急。酒醒聞塞笛。試問謫仙何處。青山外。遠煙碧。

前調 夜飲武將家有歌霜天曉角者聲調凄婉戲爲賦之

鬢聲殘角。月照梅花薄。花下有人同醉。風滿檻。波明閣。夜寂香透幕。酒深寒未著。莫把玉肌相映。愁花

見也羞落。

菩薩蠻 青陽道中

春殘日日風和雨。煙江日斷春無處。山路有黃鸝。背人相喚飛。 薔薇何似紅。

解壺宿酒醒。欹枕殘香冷。夢想小亭東。

前調 蠟梅

江南雪裏花如玉。風流越樣新裝束。恰恰縷金裳。濃熏百和香。 一枝春更多。

分明籬菊艷。卻作粧梅面。無處奈君何。

前調 夜宿余家樓聞笛聲

薄雲卷雨涼成陣。雨晴陡覺荷香潤。波影澹寒星。水邊燈火明。 笛聲依夜長。

白蘋洲上路。幾度來還去。欹枕恨茫茫。

前調 鄭舜舉別席侑觴

詔書昨夜先春到。留公一共梅花笑。青瑣鳳凰池。十年歸已遲。 要知清更明。

靈溪霜後水。的的清無比。比似使君清。

前調 春歸

牆根新筍看成竹。青梅老盡櫻桃熟。幽牖幾多花。落紅成暮霞。

閉門風又雨。只道春歸去。媚臉笑持盃。

卻驚春思回。

前調葉丞相園賞木犀次韻子師

梧桐葉上秋蕭瑟。畫欄桂樹攢金碧。花底最風流。相逢不上樓。數枝添寶髻。滴滴香霏袂。杯到莫留殘。霧牕疑廣寒。

減字木蘭花雪中集醉高樓

壺中春早。剪剗工夫天自巧。雨轉風斜。吹作千林到處花。瑤池清淺。璧月瓊枝朝夢見。莫上扁舟。且醉仙家白玉樓。

前調次韻趙仲

風梳雨洗。玉闕瓊樓何處是。萬里秋容。喚起嫦娥酒未中。相逢且醉。忙裏偷閑知有幾。況自豐年。須信金華別是天。

訴衷情木犀

疎疎密密未開時。裝點最繁枝。分明占斷秋思。一任曉風吹。金樓細。翠綃乘。畫欄西。嫦娥也道。一種幽香。幾處相宜。

謁金門春雪

春尙淺。誰把玉英裁剪。儘道梅梢開未遍。卷簾花滿院。樓上酒融歌暖。樓下水平煙遠。卻似湧金門外。

見絮飛波影亂。

前調重午

幽檻暑。又是一年重午。獵獵風蒲吹翠羽。楚天梅熟雨。吐倩君聊寄與。

往事瀟湘南浦。魂斷畫船簫鼓。雙葉石榴紅半。

好事近 辛幼安席上

華屋翠雲深。雲外晚山千疊。眼底無窮春事。對楊枝桃葉。夢。任翻成蝴蝶。

老來沈醉爲花狂。霜鬢未須鐸。幾許夜闌清。

前調 鄭德興家留飲

秋意滿芙蓉。紅映小園叢竹。風裏鳳簫聲闕。有新粧明玉。處。共修眉爭綠。

詩翁相對兩悠然。一醉繞黃菊。目盡晚山橫。

秦樓月 次韻陳子象

鶯聲寂。春風欲去難蹤跡。難蹤跡。幾枝紅藥。萬金消得。樽莫負賞心良夕。

青銅鏡裏朱欄側。照人也似傾城色。傾城色。一

清平樂 辛丑重陽日劉守招飲石龍亭追錄

危亭崛起臥蒼龍。絕景畫圖中。便作龍山高會。千年樂事能同。

使君晏處丹楓影。淡黃花香濃。不惜歸

按照月直教破帽吹風。

賀聖朝 送天與

斜陽只向花梢駐。似愁君西去。清歌也便做陽關。更朝來風雨。佳人真道。一杯須近。總眉峯偷聚。明年歸詔上鸞臺。記別離難處。

西江月 閩重陽

一度難逢佳節。今年兩度重陽。菊花猶折御衣黃。莫惜危亭更上。況有飛觴灑玉。從教醉帽吹香。興來相與共清狂。頻把新詞細唱。

前調 春歸

山路冥冥雨暗。溪橋陣陣花飛。一年寂寂又春歸。白髮自驚塵世。不惜障泥渡水。且尋團扇題詩。杜鵑休繞暮煙啼。我欲風前重醉。

燕歸梁 木犀

涼月圓時。翠幃深鎖。非霧沈沈。廣寒宮裏未歸人。共結屋住黃金。繁枝未老。秋光淡。好風露。總關心。天香不奈遠相尋。更剪巧。上瑤簪。

南柯子 次韻姚提點行可席上見贈

急雨朝來過。濃雲晚半收。荷香便傍酒樽浮。極目淡煙斜照。滿芳洲。消盡人間暑。翻成一段秋。使星南

楚轉東甌。只恐禁林歸詔，未容留。

前調 廣德道中遇重午

野杏搗枝熟，戎葵抱葉開。村村簫鼓畫船回。客裏不知時節，又相催。角黍堆冰碗，兵符點翠釵。去年今日共傳杯。應憮榴花獨立，望歸來。

浪淘沙 覺度寺

席地賞殘紅。少駐孤蓬。一春不奈雨和風。雨自無情風有恨，花片西東。雲澹遠峯濃。綠遍高桐。神仙知在此山中。萬古消凝多少事，目盡晴空。

前調 趙宮文席上

倦客怕離歌。春已無多。閑愁須倩酒消磨。風雨纔晴今夜月，不醉如何。玉笋圓金荷。情在雙蛾。二年能得幾經過。花滿碧溪歸棹遠，回首煙波。

前調 芍藥

鷓鴣怨花殘。誰道春闌。多情紅藥待君看。濃淡曉粧新意態，獨占西園。風葉萬枝繁。猶記平山。五雲樓映玉成盤。二十四橋明月下，誰凭朱欄。

鷓鴣天 雪

山繞江城臘又殘。朔風垂地雪成團。莫將帶雨梨花認，且作臨風柳絮看。煙杳渺，路瀾漫。千林猶待月

爭寒。憑君細酌羔兒酒，倚遍瓊樓十二欄。

前調九日雙溪樓

不惜黃花插滿頭。花應卻爲老人羞。年。年。九日常拚醉。處處登高莫浪愁。初浮。多情雨後雙溪水。紅滿斜陽自在流。

前調九日登赤松絕頂

老去休驚節物催。菊花端的爲人開。攜壺幸有齊山客。懷古還如單父臺。重來。不須細把茶萸看。且盡豐年酒一杯。

虞美人送韓子師

西風斜日蘭皋路。碧障連紅樹。天公也自惜君行。小雨霏霏。特地不成晴。住。莫驚華髮笑相扶。記取他年同姓。兩尙書。

前調懷金華九日寄葉丞相

登臨自古騷人事。慘慄天涯意。金華峯頂做重陽。月地千尋。風裏萬枝香。醉。雙溪明月亂山青。飛夢時時。猶在最高亭。

前調七夕

煙霄脈脈停機杼。雙鵲飛來語。踏歌聲轉玉鈎斜。好是滿天風露。一池花。

離多會少從來有。不似人間

久歡情誰道隔年遲。須信仙家日月未多時。

前調葉夢錫園十月海棠盛開

詔書昨夜覆春到。綠野花爭早。幾枝先見海棠開。全勝隴頭衝雪。寄江梅。破寒滴滴嬌如醉。不比春饒。睡。萬紅千紫莫嫌遲。看取滿城花送。袞衣歸。

夜行船再至東陽有歌予往歲重九詞者

極目高亭橫遠軸。拂新晴黛蛾依舊。策馬重來。秋光如畫。霜滿翠梧高柳。菊羊橙看遠對酒。歡情似那時重九。樓上清風。溪頭明月。不道沈郎消瘦。

南鄉子龍眼未開有詩詞者戲爲賦之

江路木犀天。梨棗吹風樹樹懸。只道荔枝無驛使。依然贏得驪珠萬顆傳。香露滴芳鮮。並蒂連枝照綺筵。驚走梧桐雙睡鵲。應憐。腰底黃金作彈圓。

前調中秋前一日飲趙信申家

細雨弄中秋。雨歇煙霽玉鏡流。喚起佳人橫玉笛。凝眸收拾風光上小樓。爛醉判扶頭。明日陰晴且漫愁。二十四橋何處是。悠悠。忍對嫦娥說舊遊。

醉落魄務觀席上索賦

樓頭晚鼓。佳人莫唱黃金縷。良宵燈火還三五。腸斷扁舟。明日江南去。離觴欲醉誰能許。風前蝶鬧蜂

兒舞。明年此夜知何處。且插梅花。同聽畫簷雨。

前調 戊戌重陽龍山會別

菊花又折。今年真是龍山客。杯行激灑新醅白。一醉相歡。莫便話離側。從教破帽頻欹側。樓頭霜樹明秋色。憑高待把疎星摘。天近風清。不怕暮雲隔。

一剪梅 葉夢錫席上

竹裏疎枝總是梅。月白霜清。猶未全開。相逢聊與著詩催。要趁金波。滿泛金盃。多病慚非作賦才。醉到花前。探得春回。明年公已在鸞臺。看取春風。丹詔重來。

臨江仙 次韻子雲中秋

記得年時離別夜。都門強半清秋。今年想望只鄰州。星連南極動。月滿大江流。芸閣老仙多妙語。雲階清夢曾遊。屐聲還認庾公樓。金波搖酒面。河影墮簾鉤。

前調 寄張安國

自古文章賢太守。江南只數蘇州。而今太守更風流。熏香開畫閣。迎月上西樓。見說宮粧高髻擁。司空卻是遨頭。五湖莫使具扁舟。玉堂紅葉在。遠勝百花洲。

江神子 建安縣戲趙德莊

十年此地看花時。醉題詩。夜彈棊。湖海相逢。曾共惜芳菲。前度劉郎今度客。嗟老矣。鬢成絲。江梅吹盡

柳橋西。雪紛飛。畫船移。滿眼青山，依舊帶寒溪。往事如雲無處問，雲外月，也應知。

前調 金山會飲

金銀樓閣認蓬萊。曉煙開。上崔嵬。風引孤帆，誰道卻船回。鵬翼倚天鼇背穩，驚浪起，雪成堆。翩翩黃鶴爲誰來。醉持杯。共徘徊。四面江聲，腳底隱晴雷。織女機頭憑借問，何處更有瓊臺。

滿江紅 丁亥示龐祐甫

梅欲開時君欲去，花誰同折。應悵望、江津千樹，晚煙明雪。花似故人相見好，人如塞鴈多離別。待留君、重看水邊花，花邊月。臺城路，山如闕。追往事，傷時節。但春風春雨，古人愁絕。多少揚州詩興在，直須清夢翻蝴蝶。問他年誰記飲中仙，花應說。

前調 自鹿田山橋小集潛嶽寺坐中酬陳子象詞

寂寞山城春已半，好花都折。無奈向陰晴不定，冷煙寒食。莫問花殘風又雨，且須爛醉酬春色。歎使君華髮又重來，人應識。丹井畔，山橋側。空翠裏，煙如織。便直教馬上，醉巾霑濕。丞相車茵端未惜，孟公好客聊爲客。算明年溪路海棠開，還相憶。

前調 再至丹陽每懷務觀有歌其所製者因用其韻示王季夷章冠之

江繞層城重樓迴，依然山色。有佳人猶記，舊家離別。把酒只如當日醉，插毫贖欠樽前客。算平林有恨寄傷心，煙如織。湖平樹，花連陌。風景是，光陰易。歎新聲渾在，斷雲難覓。暮雨不成巫峽夢，數峯還認湘波。

悲。但與君同看小槽紅，眞珠滴。

水調歌頭席上次韻王德和

世事不須問，我老但宜仙。南溪一曲，獨對蒼翠與孱顏。月白風清長夏，醉裏相逢林下，欲辯已忘言。無客問生死，有竹報平安。少年期，功名事，覺燕然。如今憔悴，蕭蕭華髮抱塵編。萬里蓬萊歸路，一醉瑤臺風露，因酒得全天。笑指雲階夢，今夕是何年。

前調七月六日與范至能會飲垂虹是時至能赴括蒼予以九江命造朝至能來賦

江路曉來雨，殘暑夜全消。人言天上今夕，飛鵲漸成橋。杳杳雲車何處，脈脈紅蕖香度，瓜菓趁良宵。推枕斷虹卷，撫檻白魚跳。五湖客，臨風露，倚蘭苕。雲濤四起，極目人世有煙霄。我送君舟西渡，君望我帆南浦。明日恨迢迢。且醉吳淞月，重聽浙江潮。

前調寄陸務觀

明月照多景，一話九經年。故人何在，依約蜀道倚青天。豪氣如今誰在，賸對岷峨山水，落紙起雲煙。應有陽臺女，來壽隱中仙。相如賦，王褒頌，子雲玄。蘭臺麟閣，早晚飛詔下甘泉。夢繞神州歸路，却趁雞鳴起舞，餘事勒燕然。白首待君老，同泛五湖船。

前調次韻子雲慕山見寄

漱漱桂華滿，搖落楚江秋。去年今夜，相望千里一扁舟。滿目都門風露，離別淒涼幾度，霜雪漸盈頭。山水

最佳處、常恨不同遊。少年約、談笑事、取封侯。田園歸晚、休問適不用吾謀。身外功名何處、屈指如今老去、無夢到金甌。贖買五湖月、改笛下滄洲。

前調水洞

今日我重九、莫負菊花開。試尋高處攜手、躡屐上崔嵬。放目蒼巖千仞、雲護曉霜成陣。知我與君來。古寺倚修竹、飛檻絕纖埃。笑談間、風滿座、酒盈杯。仙人跨海、休閒隨處是蓬萊。河有仙骨巖、落日平原西望、鼓角秋深悲壯。戲馬但荒臺。細把茱萸看、一醉且徘徊。

前調雨花臺

澤國又秋晚、天際有飛鴻。中原何在、極目千里暮雲重。今古長干橋下、遺恨都隨流水。西去幾時東。斜日動歌管、萸菊舞西風。江南岸、淮南渡、草連空。石城潮落、寂莫煙樹鎖離宮。且圖樽前酒美、莫問樓頭佳麗、往事有無中。卻笑東山老、擁鼻與誰同。

前調和龐祐甫見寄

落日澹芳草、煙際一鷗浮。西湖好處、君去千里爲誰留。坐想敬亭山下、竹映一溪寒水。飛蓋共追遊。況有樽前客、相對兩詩流。笑談間、風滿座、氣橫秋。平生壯志、長嘯起舞看吳鉤。紅白山花開謝、半醉半醒時節、春去子規愁。夢繞水西寺、回首謝公樓。

聽清歌初轉、翠嶺雲橫、乍飛遠駐。水落秋明，正千巖呈露。況有賓朋，飄然才調，盡凌空鷓鴣。步繞西疇，同尋南澗，郊原新雨。好客聲名，鄭莊風韻，松菊栽成，故侯瓜圃。燕去鴻來，笑人生離聚。老子偷閑，愛君三徑，共一樽芳醕。待約梅仙，他年丹就，騎鯨飛去。

念奴嬌 中秋攜兒輩步月至極目亭寄懷子雲兄

去年秋半，正都門結束，相將離別。激激雙溪新鴈過，重見當時明月。步轉高樓，淒涼看鏡，綠鬢紛成雪。晚晴煙樹，傍人飛下紅葉。還記江浦潮生，雲濤天際，涌金波一色。千里相望渾似夢，極目空山圍碧。醉拍朱欄，滿簪丹桂，細與姮娥說。倚風孤嘯，恍然身在瑤闕。

前調再用韻答韓子師

定交最早，歎西津幾度，忽忽論別。世事浮雲山萬變，只有澹江橫月。長憶追隨，湖山好處，醉帽欹風雪。竹陰花徑，與來題盡桐葉。誰憶此地相逢，鬢毛君未，白眉添黃色。屈指煙霄歸詔近，路入龍樓金碧。千載功名，一樽歡笑，會作他年說。倚天長劍，夜寒光透銀闕。

前調次陸務觀見貽念奴嬌韻

湖山泥影，弄晴絲目送天涯鴻鵠。春水移船花似霧，醉裏題詩刻燭。離別經年，相逢猶健，底恨光陰速。壯懷渾在，浩然起舞相屬。長記入洛聲名，風流觴詠，有蘭亭脩竹。絕唱人間，知不知，零落金貂誰續。北固煙鐘，西州雪岸，且共杯中綠。紫臺青瑣，看君歸上羣玉。

前調又次韻

春來離思、正樓臺燈火、香凝金戟。楊子江頭嘶騎擁、楊柳花飛留客。枚乘聲名、謫仙風韻、更賦長相憶。酒闌相顧、起看月墮寒壁。樽前誰唱新詞、平林真有、恨寒煙如織。燕鴈橫空梅蘂亂、醉裏隔江聞笛。白髮逢春、湖山好在、一笑千金直。待君歸詔、買船重話疇昔。

水龍吟 溪中有浣衣石

亂山深處逢春、斷魂更入桃源路。雙雙翠羽、濺濺流水、濛濛香霧。花裏鶯啼、水邊人去、落紅無數。恨劉郎鬢點、星星華髮、空回首、傷春暮。寂寞雲間洞戶。問當年、佳期何處。虹橋望斷、瓊樓深鎖、如今誰住。綠滿千巖、浣衣石上、倚風凝貯。料多情好在、也應笑我、卻忽忽去。

前調夜宿化城得張安國長短句戲用其韻

五溪深鎖煙霞、定知不是人間世。軒然九老、排雲一笑、蒼顏相對。星斗垂空、月華隨步、酒醒無寐。廣寒已近、嫦娥起舞、天風動、搖丹桂。極目層霄如洗。正千巖、稜稜霜氣。飛泉半落、蒼崖百仞、珠翻玉碎。金柝松成、葛洪丹就、如今千載。歎謫仙詩在、騎驢未遠、且留君醉。

瑞鶴仙 送王季夷

西風吹暮雨、正碧樹涼生、送君南浦。蟬聲帶殘暑。滿高林斜照、暝煙橫渚。故鄉路阻、更秋入、江城鴈度。悵天涯、幾許閑愁、對酒共成鬆旅。休問功名何在、綠鬢吳霜、素衣塵土。離觴緩舉。收玉筍、聽金縷。歎凌雲

才調、烏絲欄上。省把清詩漫與。見洛陽、年少交遊、倩君寄語。

薄倖送安伯弟

送君南浦。對煙柳青青萬縷。更滿眼、殘紅吹盡、葉底黃鸝自語。甚動人、多少離情、樓頭水闊山無數。記竹裏題詩、花邊載酒、魂斷江干春暮。都莫問、功名事、白髮漸星星如許。任雞鳴起舞、鄉關何在、憑高目盡。孤鴻去、漫留君住。趁醪醑、香暖、持盃且醉瑤臺露。相思記取、愁絕西牕夜雨。

...

...

...

...

...

...

...

...

...

...

...

...

...

...

南澗甲乙稿卷八

表

賀冊寶禮成尊號表

天地明察。昭舜孝之無遠。日月光華。慶堯齡之有永。鴻稱大備。喜氣橫流。臣聞極天下以事親。斯啓安榮之運。本人心而御治。茲爲仁壽之基。洪惟慈闈。膺萬歲之期。實繫聖君。寵四海之化。惟動不應。不顯其符。隆大德必得之名。鏤彌文于寶牒。紀泰元增受之策。崇嘉號于法宮。恭惟皇帝陛下。道際堪輿。恩霑動植。歡均海宇。不遺小國之臣。禮盛天正。亦尙一人之慶。然而身濟大業。躬行至仁。視膳問安。匪徒區區。曾閱之事。勝殘去殺。共推赫赫。禹湯之明。是宜尼父之從心。遂見周王之復古。臣屬嬰符竹。阻望宸楓。帝夢無疆。豈但同符于文武。邦儀曠舉。真成度越于漢唐。

賀太上皇帝表

九州致養。坐凝景命之中。七政呈祥。運格宸心之縱。光增典冊。慶溢家邦。恭惟尊號陛下。若聖與仁。能寬而惠。功成白水。邁建武三十二年。道備崆峒。陋廣成千二百歲。脫屣萬機之重。怡神五閭之餘。宜膺睿算之無窮。豈視歷經而可紀。神妃儷極。共披金匱之書。聖子當陽。長奉玉卮之壽。臣屬拘職守。阻造闕廷。帝

堯蕩蕩以難名。第切康衢之頌。周王勉勉而壽考。彌瞻雲漢之章。

賀太上八十受尊號冊皇帝表

臣某言。伏觀詔書。加上光堯壽聖憲天體道性仁誠德經文緯武紹業興統明謨盛烈太上皇帝。壽聖齊明廣慈備德太上皇后。尊號冊寶者。玉卮稱壽。儼二紀之升平。寶冊增名。伸兩宮之大慶。禮嚴八秩。歡動九圍。臣聞惟舜事堯。斯啓髦期之社。若文與武。式彰夢帝之祥。考載籍之攸傳。歷漢唐而未覩。於昭聖代。肆舉上儀。一生二。二生三。肇炎緒之符于有永。萬取千。千取百。迪慈闡之算于無疆。一時並上于鴻稱。嗣歲咸新于縟典。恭惟皇帝陛下。系隆本始。德邁永平。浚中國而撫四夷。將整涓橋之駕。坐明堂而朝羣后。益表雲臺之功。而乃襲龍袞以下同。老萊之衣。調神鼎而躬致天下之養。豈爲盛事。彌介萬年。臣屬領真祠。阻趨觀闕。福延宗社。久知上帝之顧歆。惠及昆蟲。更納斯民于仁壽。

賀太上皇帝尊號表

臣某言。伏觀詔書。皇帝帥羣臣詣德壽宮。〔案〕宋史高宗稱德壽宮。加上光堯壽聖憲天體道性仁誠德經文緯武紹業興統明謨盛烈太上皇帝尊號者。膺受命之符。久熙神于物外。增泰元之策。爰加號于域中。掩載籍以彌高。洽華夷而共慶。竊以期頤在宥。自堯舜而有聞。壽考逾中。歷漢唐而未見。況脫屣而安天下之養。垂衣而與造物者遊。王則次春。御常珍于嗣歲。孫又有子。貽丕緒于本支。斯惟無得而名。是爲必得其壽。恭惟光堯壽聖憲天體道性仁誠德經文緯武紹業興統明謨盛烈太上皇帝陛下。好生本天

地之大德。寢兵成帝王之極功。三十六年躬行慈儉之寶。萬有千歲力致太平之基。宜典冊之屢書。與臯圖而俱永。臣欽奉盛際。屬領外祠。九賓臚傳。雖莫奏甘泉之頌。百神率舞。第惟伸嵩嶽之呼。

會慶節賀表

良月就盈。夙啓誕彌之旦。五星來聚。聿迎元命之年。宗社騰輝。華夷協慶。恭惟皇帝陛下。恩沾動殖。道貫堪輿。體虞舜之無爲。懋介兩宮之祉。秉周文之至德。益深四表之歡。策增授于泰元。禮獨行于昭曠。本支百世。已觀孫子之施。壽考萬年。將見帝王之冠。臣久叨祠館。阻造闕廷。六樂成儀。莫預鈞天之宴。九賓在望。第聞嵩嶽之呼。

聖神出震。凝寶命于昊天。歷數紹堯。啓昌辰于良月。乾坤薦祉。夷夏騰歡。恭惟皇帝陛下。大德好生。休功不殺。孝悌而光四海。恭儉以屏五兵。治格文明。將繼六經。而七祥開壽。遐允膺萬歲之三。臣屬領祠庭。阻趨觀闕。雖田穀之仰膏雨。莫謝于生成。若澤葵之傾太陽。彌深于頌禱。

神聖健生。昭格熙平之運。乾坤錫羨。式彰震夙之辰。海嶽騰歡。華戎共慶。恭惟皇帝陛下。明並日月。功光祖宗。整法駕于園丘。彌文嗣舉。奉慶儀于前殿。載籍未聞。舊傳河水之清。茲見壽星之會。臣屬叨詞館。遙睇闕廷。莫陪嵩嶽之呼。恭趨盛旦。第切華封之祝。益介萬年。

千齡啓運。於昭上聖之生。萬歲成純。式副下民之禱。昆蟲閭澤。海嶽歡呼。恭惟皇帝陛下。勇知表邦。寬仁御世。體乾无之用。九萬化默成。法離照之繼明。四方歲久。候祥輝于良月。增神筴以後天。臣屬仰慶符阻。

趨觀闕。續天地之頌。莫追考父之能。廣立極之議。第切封人之願。

生商定位。仰神聖之挺生。日月光華。驗基圖之復旦。四方來賀。萬國咸寧。恭惟皇帝陛下。陟禹之迹。誦堯之言。通孝悌于神明。惟動丕應。成安強于道德。未占有孚。載臨震夙之辰。益著升平之象。體太極之三爲一。功卽混于華戎。膺眉壽之萬有千。治彌高于今古。臣猥叨祠秩。阻造廷紳。擊壤歡呼。第切康衢之頌。稱觴忭舞。如聞嵩嶽之呼。

昊天成命。有開載夙之祥。良月就盈。益仰誠彌之節。照臨所被。鼓舞惟均。恭惟皇帝陛下。勇智以表萬邦。神明而光四海。政刑修于閒暇。丕昭有截之威。道德成乎安強。共介無疆之壽。茂建系隆之業。聿臻恢復之期。臣徒深望日之誠。莫預造廷之慶。紹登封之七十一。俯觀世祖之成功。膺歷數之萬八千。仰繼天皇之盛際。

占履武之祥。序開良月。紀流虹之旦。慶及溥天。莫酬在宥之恩。共上無疆之祝。恭惟皇帝陛下。丕承武烈。重協帝華。修車馬以會東都。聖功可待。詰戎兵而陟禹迹。德政用修。洽四表之歡聲。介萬齡之眉壽。臣屬拘祠館。阻造宸廷。奉百末之觴。魚龍在望。上千秋之鑑。葵藿傾心。

祥開良月。占五星聚井之期。慶泱寰區。啓大電繞樞之旦。乾坤丕應。宗社延洪。恭惟皇帝陛下。睿智以有臨。常德以立武。會期長樂。聿求萬國之歡。獻獲大安。坐式九圍之命。懋建隆平之業。於昭震夙之辰。合二氣于無窮。潤三光而不老。臣叨塵從橐。久去宸廷。履土戴天。莫罄華封之祝。望雲就日。第增嵩嶽之呼。

天申節賀表〔案〕宋史高宗生辰名天申節

紹炎圖于三紀。久釋萬機。嚴端節于千秋。茂迎八秩。祥占嵩嶽。喜溢康衢。恭惟尊號。德輔至仁。功高再造。怡神物外。自得逍遙之遊。玩意域中。不遺慈儉之寶。仰聖子神孫之共慶。宜普天率土以均歡。臣屬領真祠。阻趨觀闕。候如復旦。驗神光七十五來。禮盛祈年。頌眉壽萬有千歲。

中天紹復。漢儀莫盛于兩京。垂拱耄期。堯壽特高于五帝。祥占星火。喜溢康衢。恭惟尊號。道大難名。功成不處。丕謨與子。無憂亶惟文王。好生在民。盛德孰加虞舜。脫屣萬機之外。怡神四海之尊。八千歲爲春。坐俟河清之運。九萬里而上。行觀輿地之歸。臣久去班聯。尙廢祠秩。仰房心之叶瑞。莫遂窺瞻。驗箕翼之齊輝。第深忭舞。

九州致養。仰太極以居尊。四表騰歡。慶誕彌之紀節。恭惟尊號。功成不幸。道妙難名。跡並商周。茂建中興之烈。批視堯舜。猶全高蹈之風。椿齡迎八秩之祥。天壽啓萬年之永。臣叨塵從橐。阻造宸廷。驗火德之重明。徒深默舞。祝乾符之增授。第切嵩呼。

道契崆峒。甫迪期頤之慶。光凝華渚。式昭載夙之祥。燕及敷天。歡騰萬國。恭惟尊號。功高漢祖。仁並唐堯。踰建武三十二年。授之聖子。迎天皇萬八千歲。重見神孫。倬然壽考之符。信矣古今之冠。臣屬拘祠秩。阻造闕廷。出丙入丁。共仰星躔之極。先庚後甲。益知帝命之申。

天命不顯其符。久格系隆之運。大德必得其壽。式昭震夙之辰。夷夏均歡。人神共慶。恭惟尊號。功超蓬古。

治復承平。再造丕基。陋漢唐其培塿。允恭大業。儻堯舜猶糝糠。方觀累洽以重熙。自得長生而久視。後乾坤而不老。膺歷數以無窮。臣猥竊真祠。阻趨宸陛。仰鑄京之燕。惟深葵藿之傾。聯嵩嶽之呼。第切昆蟲之禱。

進銀絹表

萬機脫履。仰崆峒訪道之辰。四海貢珍。盛華渚呈祥之旦。虔修方物。恭奠大庭。前件銀絹。美異昆田。實諸文篋。不腆敵賦。敢爲宰旅之歸。無疆惟休。共上封人之祝。

賀太上皇帝表

堯舜在上。紹成復古之勳。任姒比隆。共格齊天之算。禮新一代。慶洽萬方。竊以日候再中。故月承而有耀。乾元用九。茲坤順以無疆。仰泰皇迎增壽之祥。乃柔極兆同休之慶。道均不老。理合自然。恭惟尊號太上皇帝陛下。脫履怡神。握符御世。文王之與聖子。既共保于鴻基。帝嚳之有元妃。宜並申于寶命。肆差春旦。繼舉盛儀。靡煩八駿之馳。坐致七桃之獻。臣屬嬰祠秩。久去宸廷。聽九成之簫韶。第想雲龍之會。祝萬歲之眉壽。徒殫葵藿之誠。

太上皇帝慶壽禮成賀表

慈闈介壽。亘古未聞。盛禮告成。普天同慶。恭惟尊號太上皇帝陛下。仁參高厚。道冒華戎。克遜成功。父子自侔于堯舜。系隆底豫。君臣未數于商周。屬茲萬歲之期。翕受四方之賀。啓祥輝于南極。候淑氣于東郊。

不踰矩以從心。既驗降年之有永。強爲名而字道。益知受命之無疆。臣屬守蕃宣。阻趨象魏。歌卿雲之爛。備聞海岳之歡。受神筴之增。更仰日星之紀。

皇帝賀表

慶集堯庭。仰聖人之得壽。禮行漢殿。知天子之有尊。宗社增輝。華夷受福。恭惟皇帝陛下。守先王之要道。備中國之至仁。法地法天。叶寧神于無外。盡倫盡制。極養志而不違。常慈闈膺獻歲之祥。實睿算擬傳家之喜。占斗牛之王氣。盛事冠于百王。會日月于壽星。歡聲騰乎四表。臣適叨郡寄。阻望國光。莫陪洛下諸生。作受命中興之頌。尙與海隅父老。詠蒸民立極之詩。

太上皇后七十賀皇帝表

千齡紀運。式昭帝載之隆。七秩迎年。更上母儀之慶。歡騰海宇。喜溢宮庭。竊以漢興而尊太公。媼后不書于長樂。堯老而授大舜。女皇莫著于平陽。惟一時並養于宸闈。且二聖聯躋于睿算。在今甫見。亘古未聞。恭惟皇帝陛下。齊日月之運行。事天地以明察。垂衣拱手而致化。道嘗合于兩儀。問安視膳于無違。教既刑于四海。金簡同開于壽歷。玉卮益奉于慈顏。臣逖遠從班。欽聆盛典。宴西池而歌黃竹。小融融洩洩之詩。禮南岳而倡卿雲。美蕩蕩巍巍之治。

孝慈淵聖皇帝上僊慰表

代倉司

佳兵罷警。方期鑾輅之還。遠使來庭。遽告龍髯之斷。哀纏宸極。痛浹寰區。伏以孝慈淵聖皇帝。潛德春宮。

天下陰受其賜。承休實位。生民無得而稱。蓋仁孝本于自然。慈儉存于先務。蒙塵三紀。阻覲萬方。合文王之明夷。固已行乎患難。有高宗之無逸。曾未享于春秋。恭惟皇帝陛下。坐致平康。躬修悌順。東朝違養。纔歲月之僅周。北顧在原。何禍災之荐至。音容遂邈。聖情難居。臣適以使事在遠。不獲奔赴闕廷。云云。

太上皇帝慰表

中壘貽災。遽失婦容之順。慈闈軫念。諒同子聖之悲。恭惟光堯壽聖太上皇帝陛下。脫屣萬機。頤神四表。雖自家刑國。宜俯記于內朝。而制禮緣情。願稍寬于聖慮。

太上皇后慰表

母道導臨。方嚴慶養。婦儀奄隔。遽軫慈懷。恭惟壽聖太上皇后殿下。厚德承乾。至明儷日。願徽音之欲嗣。愷柔範之莫還。願寬中節之哀。以副從宜之禮。

皇帝慰表為皇后上仙

災延椒掖。悲動楓宸。凡在照臨。舉深愴慕。伏以。大行皇后。化行恭儉。德茂柔嘉。正九御之盛儀。悵焉未久。助兩宮之大養。倏爾不終。恭惟皇帝陛下。治極寧親。功深御宇。願抑倪天之感。俯從率土之祈。

又為皇太子薨

前星失次。少海沈輝。痛極本支。悲纏寰宇。恭惟皇帝陛下。治功日起。齒德天開。宮掩長秋。願哀悼之未遠。苑空博望。乃變故之荐臻。願思付託之隆。少抑哀慈之念。

太上皇帝慰表

國有神孫。方啓重輝之盛。天開聖緒。乃貽大本之憂。恭惟尊號。備王者之無私。膺天下之至養。甲觀占夢。茂迎四世之祥。綠車在廷。遠有一朝之感。願益觀于道化。庶少抑于聖情。

太上皇后慰表

主器占憂。遂虛儲禁。含飴興起。倍軫慈衷。恭惟尊號。體備仁榮。躬行儉實。眷此重明之照。夙昭大慶之符。帝祉未施。天災遽有。願抑悲思之感。益綏壽履之康。

知婺州到任謝表

入塵法從。歲躔悅閱于再周。出假便蕃。道路僅更于數舍。仰體曲成之眷。敬宣寬大之恩。伏念臣。知力不能踰人。學術無以異衆。才疎意拙。少嘗粗志于功名。心折氣摧。晚實重傷于憂患。豈謂衰頹之朽質。寢蒙特達之聖知。始寓直于掖垣。旋參華于選部。文惟散。屢承褒袞之加。議本懇。悉荷威顏之假。感洪慈之未報。揣微分而敢安。願此東陽。今爲輔郡。財殫粟匱。適遭饑饉之餘。訟劇政繁。尤重藩宣之委。執云孱懦。可副選掄。此蓋恭遇皇帝陛下。躬慈儉以保邦。體寬仁而御下。謂臣早更州縣。或知撫字之方。憐臣久侍禁嚴。備識憂勤之意。責之列職。寵以分符。敢效昔賢。樽俎但期于賦詠。庶幾漢吏。里閭稍遂于莫安。

再知婺州到任謝表

甦酉清之美職。已冒殊恩。分太未之名邦。仍叨舊治。稍違行闕。卽屆部封。伏念臣。少嘗竊慕于古人。晚始

親逢于聖主。豈謂迂疎之質。遂蒙特達之知。造膝而貢狂愚。既屢嘉其一得。披肝而導志慮。曾何補于萬分。罔知歲月之遷。寢荷寵靈之異。昨膺召節。誤長從班。執云銓敕之平。益愧論思之謬。葵霍徒知向日。忍負寸心。犬馬猶有戀軒。敢懷去意。第每虞于譏議。仍滋懼于滿盈。自詭爲州。實惟報上。況滋寶婺。特近太微。地竊重臨。治行靡追于黃霸。時容著詠。郊居肯慕于沈侯。祇佩眷私。若爲稱塞。此蓋恭遇皇帝陛下。德參天地。道冒華戎。泰和在唐虞。肅臣工而器使。仁風慰于黎庶。擇守令以布宣。施及妄庸。荐加優渥。臣敢不恪求民瘼。寅奉藩條。官聯喉舌之司。願敢忘于左右。郡亦股肱之寄。誓益告于謀猷。

謝賜寬恤手詔碑表

宸恩寬大。衣被于羣黎。睿藻昭回。照臨于萬寓。承休甚寵。拜命惟新。竊以方國賜書。本建武中興之盛事。爲民下詔。實孝文務養之深仁。於鑠聖時。兼休二代。恭惟皇帝陛下。道侔天地。德紹祖宗。功烈無前。孝治驩騰于四表。嘉祥荐至。豐年屢格于萬邦。憫茲穀賤之或傷。尙致戶輸之過取。賜頒寶墨。申戒攸司。粲然雲漢之垂。穆若春陽之布。臣濫紆州組。躬受詔函。周賦有常。詎敢多于什一。堯言在上。庸知告以再三。

辭知建寧府表

右臣准尙書省劄子。十二月三日。三省同奉聖旨。差臣知建寧府。不候授告。疾速前去之任。候任滿前來奏事者。臣欽聞成命。愧懼無任。伏念臣以至愚極陋之質。荷上聖特達之知。擢實三銓。已乏論思之效。試守一郡。迄無善最之稱。徒知奉行寬大。以拊摩饑饉之餘。不慮自貽曠瘼。而招致悔尤之積。懇祈散地。實

微分之攸宜。以畀便藩。匪私心之敢望。況建寧之鉅鎮。本潛躍之名區。雖異時嘗叨宰字之官。豈今日遂有鎮臨之幸。已試無狀。啓處不遑。伏望皇帝陛下。遴選循良。布宣德意。俾內外咸舉其職。思小大務盡其才。寵以真祠。庶少安于庸懦。假之歲月。斯曲示于保全。臣無任瞻天望聖。激切屏營之至。所有恩命。未敢祇受。臣除已交割婺州職事。以與次官。一面起離前去衢信州聽候指揮外。謹錄奏聞。伏候敕旨。

知建寧府到任表

瀝懇顙天。莫遂請閒之願。疏恩易地。仍叨共理之榮。優假至深。凌兢罔措。伏念臣奮身疎遠。遭世盛明。入參侍從之華。每蒙異眷。出領藩宣之寄。曾乏微庸。況歲月之僅周。積過愆而靡追。孤蹤易毀。寧分近甸之憂。全度兼容。特畀潛藩之重。眷茲建水。實控閩陬。代藉初基。覺谿山之改觀。宦游淺老。慨民社之嘗臨。雖馳驅頗愧于壯年。然委付有光于前日。此蓋恭遇皇帝陛下。惠綏羣獻。明燭高微。器使人才。舉絕重輕之弊。衡持天下。悉無內外之殊。不遺菅蒯之微。尙費乾坤之造。軫其迂鈍。錫以便安。臣敢不仰體曲成。益思盡瘁。土風末俗。猶粗識其二三。利澤深仁。或布宣于萬一。

謝降官表

外臺撫戾。難追于深文。中詔施仁。第從于寬典。恩隆命薄。威極涕零。伏念臣猥以庸材。叨塵輔郡。野無青草。適歲事之荐饑。月有犀渠。復土風之善競。慨疲鷲之既竭。慚尺寸之罔功。財貨未贏。陽城之政甚拙。教條靡善。延壽之過自知。至于報應。或繆于文移。請藏務伸于法令。重貽刺舉。宜在譴訶。羸瓶之真井涓。蓋

有擠而甚者。弊車之避道左。是宜麾而去之。敢期覆燾之深。曲示保全之厚。就移職守。特據官聯。此蓋恭遇皇帝陛下。湯網務寬。舜璣惟察。念臣久更州縣。常自信其迂愚。憐臣昔侍禁嚴。每洞知其拙直。刑于善貸。責以後來。臣敢不仰副殊私。益堅素履。雖桑榆之收暮景。莫知補報之方。若葵藿之傾太陽。尙有糜捐之所。

謝放罷表

彈文甚峻。請從流放之科。宸度兼容。聊示汰歸之譴。恩深命薄。感激涕零。伏念臣猥以非才。叨塵異眷。文詞淺拙。嘗蒙甚善之褒。議論闊疎。屢動蓋高之聽。久冒清華之選。皆繇特達之知。昨自典銓。復求試郡。與之舊治。曾無數舍之勞。課以字民。尙乏期年之効。徒以世霑厚祿。身忝從班。稍知粗抑于豪強。不敢遽形于退避。明目張膽。期法令之是行。銷骨鑠金。乃誘傷之遂積。果貽清議。上負明時。然臣被拔擢于州縣者。餘二十年。荷委任于朝廷者。更十數職。寵爲過分。嗟有識之自知。貪以徇私。慨無從而可辨。儻匪皇慈之洞鑒。詎容小己之保全。茲蓋恭遇皇帝陛下。擴博愛之深仁。推好生之盛德。惟天爲大。徧覆包涵。而靡遺。如日之升。遠近幽深。而必照。察臣性本于疎直。憐臣夙勵于樸忠。不忍嚴誅。尙存善貸。臣敢不洗心念咎。銘骨知歸。迫暮景之桑榆。若爲報國。視歲寒之松柏。所以事君。

謝提舉太平興國宮表

竊輔郡之符。自貽謗戾。賦真庭之祿。俾追饑寒。滋佩恩憐。徒深感涕。臣某誠惶誠懼。頓首頓首。伏念臣學

知爲己。仕切慕君。荷聖神識。拔于衆人之中。遭逢特異。躡侍從周旋于六官之長。忌嫉已多。惟思樸直。以盡忠。詎敢窺覲。而幸進。竭因請外。復玷承流。謂抑強禁暴者。刺史之常規。若避事懷私者。古人之深恥。豈慮中傷之銖積。遂能搖動于風聞。含沙變類于短狐。射市乃遭于強弩。誣其怨望。固已墜臣于深淵。饑以貪汙。直欲錮臣于聖世。賴至仁之在上。知羣下之隱情。洞見肺肝。保全軀命。然臣恐懼閱三時之久。羸窮懷十口之憂。未容放跡于山林。但有投誠于君父。函蒙鴻造。肆軫餘生。糜廩稍于安閒。貸馳驅于衰病。茲蓋恭遇皇帝陛下。曲成萬物。懷保小民。力辨忠邪。益恢張于治具。大明黜陟。庸丕變于士風。將尋尺之有施。示蓋帷之罔棄。察其既往。許以自新。臣敢不砥礪素衷。激昂晚節。無功而祿。第爲餬口之羞。有命不渝。尙切粉身之報。

再任與國宮謝表

綴西清學士之班。尙叨美職。賦南紀祠官之祿。益愧罔功。祇荷恩憐。莫知報塞。伏念臣才爲短拙。分實騫單。圭竇華門。竊有棲遲之幸。竹筍木屐。自嗟嫁送之類。顧榮遇之已多。曾生涯之未給。一昨坐謫于郡寄。繼蒙予食于真遊。抱詩禮以傳家。詎忘所守。課蠶鹽而玩歲。僅活其孥。逮茲秋滿之初。復起年饑之慮。飛而控地。志宜遂于歸田。窮則呼天。心但祈于雨粟。果勤洪造。仍畀素餐。茲蓋恭遇皇帝陛下。德本好生。治先從欲。體成周之歸厚。草木依仁。法炎漢之用寬。昆蟲咸懌。肆紆臨照。施及妄庸。臣敢不奮厲愚衷。激昂晚節。枯魚未朽。旣均被子斗升。老馬載馳。或粗知于道路。

三任興國宮謝表

隴材無用。祇退伏于田廬。明命有加。乃荐叨于祠館。荷天從欲。揣分與慚。伏念臣頃以慙愚。誤蒙選拔。與領三銓之重。詎罄論思。蕃宣兩郡之繁。遽貽譏議。一去闕廷之下。六驚歲月之遷。戴盆曷望于層霄。徒懷眷遇。伏櫪自甘于末路。倍費保全。惟負郭之未充。慨投簪之甚迫。尙庶稍獲在安閒。得象罔之珠。益知味道。受支離之粟。滋愧匪功。茲蓋恭遇皇帝陛下。仁覆羣生。春熙庶彙。謂臣早更州縣。宜膺力之寢愆。憐臣久侍禁嚴。亦姓名之屢記。肆加存拊。俾追飢寒。臣敢不思報厚恩。誓殫晚節。餘生未泯。儻爲尺蠖之伸。素志僅酬。或致寸莛之効。

江東轉運判官謝表

竊食無功。久尸于宰掾。便私有請。尙畀于使輅。祇屆部封。具宜詔旨。伏念臣零丁墜緒。歷落凡材。一趨君璽之嚴。五閱歲躔之換。爲郎甚寵。乃官謗之自貽。去國稍淹。迄州符之未試。曲荷乾坤之造。再瞻日月之光。南省西樞之聯。曾微報効。中臺右轄之屬。荐至攝承。揣分輸誠。拜恩從欲。策名中祕之府。錫節大江之壖。地接行畿。實總陪都之調度。跡達文陛。重勤睿訓之丁寧。此蓋恭遇皇帝陛下。天覆堯仁。日躋湯聖。衡持內外。初無彼重。而此輕。器使賢愚。靡間寸長而尺短。治厲精而匪倦。功復古之是圖。致此安庸。姑從寄委。臣敢不益堅素守。無負聖知。雖攬轡登車。未究昔人之志。儻給軍轉漕。或殫異日之能。

謝起軍轉官表

羽檄調兵。僅供常職。綸言錫命。乃沐異恩。悵懇避之不俞。第祗承而爲愧。伏念臣猥以頑冥之質。誤蒙神聖之知。入侍禁塗。豈有論思之效。出分藩服。曾何善最之稱。當周王田獵。以選師。仰漢帝璽書。而賜郡。元戎十乘。奉追召之既嚴。次國三軍。觀驅馳而敢後。亦安陳于末議。竊自獻于愚忠。深懼譴訶。詎宜褒陟。披肝瀝膽。謂有願之必從。縮頸汗顏。迄無功而受賞。此蓋恭遇皇帝陛下。激昂士氣。砥礪臣工。陰闔陽開。務作新于庶政。乾旋坤闢。思底定于萬方。致茲增秩之榮。靡開尸官之濫。臣敢不領承訓飭。彌謹藩宣。躬阡陌。勸農桑。益布維新之令。修車馬。備器械。庶觀復會之期。

謝除待制表

分符出守。已叨便近之藩。錫命竊行。尙綴禁嚴之列。懇辭莫遂。賜受彌兢。伏念臣久以庸愚。誤蒙簡拔。周遊省戶。參掾屬者九年。密勿從班。備銓衡于兩選。積有丘山之厚戾。了無塵霧之微勞。外并名州。實踰分願。中聯美職。滋冒恩榮。怳然未定之驚魂。甚矣橫流之感涕。茲蓋恭遇皇帝陛下。仁如天大。德與日升。器使羣材。管蒞盡歸于採擷。生成庶彙。蟲魚咸遂于飛潛。曲示眷私。用光臨遣。臣跡雖違于丹陛。名猶濫于清廂。惟近臣獻納之私。未殫于補報。若刺史中和之布。敢負于使令。

除龍圖閣學士謝表

冒三銓之長。久玷近班。首六閣之聯。遽叨美職。恩踰意表。愧溢顏間。臣某誠惶誠懼。頓首頓首。竊以入從出藩。本侍臣之常禮。循名責實。斯主上之至權。逮夫寵數之驟加。必有勞能之可紀。仰河圖于東序。是惟

冠百世之彌文。通禁橐于西清。必以待一時之舊老。如臣者。少而孤陋。晚益顯冥。符節屢頒。久載馳于周道。玦環遞賜。悵幾入于修門。未酬神聖之知。竊有滿盈之懼。茲由常伯。自詭便蕃。綸命高華。豈謂疏策之特異。奎躔炳耀。殊非避寵之能安。此蓋恭遇皇帝陛下。湯聖日躋。堯仁天覆。察臣持循法令。粗知課力之方。俾臣宣布詔條。曲示臨民之渥。顧此鶩鳩之質。曷窺龍馬之光。臣敢不。被飭懦衷。答揚隆施。官雖外服。尙司寶禁之儲。名在諸儒。敢忘論思之報。

權吏部侍郎謝表

服勤公掾。濫一官四至之榮。列職禁塗。積十載九遷之幸。拜恩逾厚。揣分奚宜。伏念臣。仕本慕君。學知爲己。守高曾之規矩。嗟涉世以自疎。聞師友之淵源。慨決科而已繆。一從縣宰。誤玷王官。蚤緣寢歷于省臺。出入薦叨于符節。微軀欲奮。幾成控地之鳩。弱羽易摧。屢作退風之鷁。矧憂患支離之後。荷生成收召之殊。兩轄重陪。豈有彌綸之効。西垣暫直。曾何潤色之工。方虞未免于譴訶。敢意遽蒙于簡拔。惟茲選部。實異他曹。內以檢制于吏姦。外以整齊于士類。當劇煩而罔避。匪庸懦之所堪。此蓋恭遇皇帝陛下。天覆函生。日熙庶政。賢者在位。而能者在職。舉無棄于羣材。仕者欲朝。而農者欲耕。俾各安于至化。眷茲銓敍之職。責其愚鈍之功。臣敢不三沐自修。百爲盡節。若課吏期于平允。可無衡鑒之功。而從臣許以論思。尙切涓埃之報。

除吏部侍郎謝表

典銓無補。每懷代匱之憂。拜命有加。乃冒爲眞之寵。伏念臣愚不更事。老無取材。用意闕疎。最出衆人之後。秉性樸直。但期聖主之知。自擢貳于銓衡。實坐糜于歲月。威靈遠被。僅揚使者之旌。職業空居。猶竊從臣之橐。本虞曠戾。敢冀恩榮。此蓋恭遇皇帝陛下。丕冒華戎。裁成品彙。謂上策莫如自治。將內外以舉安。思衆賢聚于本朝。故涓埃之咸取。顧嗟庸懦。亦在喪陞。臣敢不仰體至仁。誓堅素履。惟守資格。而師法令。罔敢怠遑。若殫忠蓋。而罄論思。是爲報塞。

郊赦加食邑謝表

禮行郊報。初莫預于駿奔。恩衍戶租。乃重沾于惠術。叨榮逾厚。揣分知慚。伏念臣久去班聯。尙尸祠祿。材能素謫。了無橫草之功。齒髮寢彫。第有守株之志。莫致慶成之善頌。遂膺進律之殊褒。駢邑旣增。取禾與愧。此蓋恭遇皇帝陛下。化參天地。道通神明。方萬歲以成純。躬致嚴禋之祀。靡一夫之不被。益均臣庶之歡。申賁絲綸。用彰典禮。臣敢不誓圖報稱。欽佩眷慈。縱觀渭上之朝。詎忘異日。獨抱周南之病。自信餘生。

謝進封潁川郡公加食邑實封表

慈皇介壽。霈及敷天。微臣何功。例叨進律。仰止王言之賁。遽躋公社之榮。伏念臣材不逮中。愚無所用。蚤蒙異擢。詎忘補報之階。自取謗傷。尙竊安閒之祿。方舜治格無爲之盛。乃堯齡臻難老之期。千歲有逢。萬邦胥慶。錫爵遂超于五等。疏封且冒于多田。茲蓋恭遇皇帝陛下。老老以興民。君君而賦政。盛禮備樂。成儀煥于兩宮。宥罪薄征。懽聲溢于四表。慨茲朽質。曷副深仁。臣敢不誓罄丹誠。恩酬洪造。老當益壯。況懷

伏櫪之心。用之則爲益。勵守株之志。

謝加食邑實封表

臣某言。伏准告命。以明堂大禮慶成。加臣實邑三百戶。食實封一百戶。臣已望闕謝恩。祇受訖者。禮行秦室。會草預于駿奔。賞逮羣工。乃例霑于惠術。人微曷稱。恩重莫酬。伏念臣久玷從班。尙叨祠祿。散材無用。自甘屏跡于丘園。盛典有光。豈復相儀于禮樂。解澤旣敷于溥率。歡聲實徧于邇遐。未嘗趨造于朝。猶蒙多與之邑。茲蓋恭遇皇帝陛下。日新聖德。天覆萬方。弗遺小臣。欲賢愚之並施。爰有大賚。俾動植以知仁。臣敢不誓竭疲庸。仰思報塞。三百戶而無管足。增寒陋之華。八千歲以爲春。但祝聖神之壽。

代賀南郊禮成表

泰壇修報。寶歷迎長。惠浹百神。歡均四海。恭惟皇帝陛下。仁如天地。德類祖宗。年穀屢豐。馨香薦于至治。禮樂大備。形聲協于泰和。惟茲上帝之博臨。式見聖人之能饗。合祿允塞。益顯從周之文。並侑孔嚴。光昭復禹之盛。臣屬叨假節。阻預奉璋。聆恩事之備成。惟深忭舞。布詔書之寬大。彌切欽承。

代施資政謝靜江府到任表

攬從祠館。就領帥符。恩許自新。願馳驅之敢後。榮踰始望。徒踟躕以靡遑。已見吏民具宜。詔旨伏念。臣性資凡陋。術業空疎。比叨預于政機。迄無裨于國論。老將耄及。寧逃負乘之譏。福過災生。積有素餐之戾。曲荷乾坤之造。尙寬鈇鉞之威。竊食投閒。慨驚魂之未定。銜恩起廢。悅神觀以俱還。惟茲八桂之封。外控百

蠻之壤奉琛。面內廟謀。方事于綏懷。剖竹臨邊。闔寄益資于鎮撫。豈翳衰鈍。可副使令。茲蓋恭遇皇帝陛下。大度兼容。至明洞照。任賢而福天下。邁成湯選衆之仁。進德以尊朝廷。迪虞舜知人之哲。洪啓同寅之治。聿求共理之良。臣敢不仰體眷慈。誓殫綿力。雖聽風觀化。未能追循吏之規。而省事清心。亦足示遠人之意。

代江南提舉范直閣謝到任表

千里造朝。方蒙于收召。十城命使。遽玷于光華。已屆郵封。恭宣詔旨。伏念臣起家寒遠。涉世迂疎。一昨簞跡于書林。屢嘗賜對于便坐。身逢聖主。每懷造膝之忠。意忤權臣。幾致反唇之罪。三祈閒館。兩左遐州。幸公道之復開。獲清光之再覩。愚衷自勵。雖知僅免于悔尤。舊學寢荒。豈有發明于議論。敢期齒獎。曲賜眷憐。寵之內閣之名。付以外臺之寄。人微恩厚。感極涕零。此蓋伏遇皇帝陛下。懋建大中。敷求至治。乾綱獨運。節高務以鼎新。離照無私。萃羣材而器使。致茲庸瑣。亦誤選掄。臣敢不深究貨源。持平廩政。雖激濁揚清之事。職所願爲。若奉公守正之心。義當無替。

代劉綸事謝復祕閣修撰致仕表

竊食異祠。久逼桑榆之暮。拜恩內閣。遂築園里之歸。揣已踰涯。荷天從欲。伏念臣奮身寒遠。賦分奇窮。從六藝以決科。僅而得仕。接諸儒而奏技。晚特逢時。頃絲憲府之聯。獲冒書林之選。螭坳載筆。嘗預記于王言。鳳閣判花。復濫司于帝制。進膺瑣闥。數侍清光。乃遽速于顛墜。迄自投于閒散。鄉閭作佚。既閱十年。香

火無功。殆逾數任。惟是衰殘之質。寢登耄耋之期。力已弗任。無復爲駒之意。老將奚道。徒懷化鶴之悲。祇有布其腹心。庶自乞其骸骨。豈期睿眷。特賁殊私。稍還論述之名。俾識退休之寵。義兼念舊。恩出再生。茲蓋恭遇皇帝陛下。簪履興慈。蓋帷示軫。欲曲全于小物。肆紆照于容光。謂臣麋鹿之姿。豈軒裳之是適。憐臣犬馬之齒。曾鐘漏之幾何。許以傳家。尙爲報國。臣敢不効忠自勗。守道弗渝。擊壤而歌唐虞。預識豐年之瑞。閉門而詠周孔。益知化日之長。

代徐侍郎謝宮祠表

典銓法從。久懷竊位之差。賦祿真祠。更遂養疴之請。恩輝逾厚。感涕何言。伏念臣性本闕疎。才仍淺陋。早緣執戟。不爲當路之容。晚預賜環。最取衆人之後。使北庭于將變。持漢節以僅還。擢副民曹。顧已亡于善狀。易司吏選。曾不畏于多言。徒知肝膽之欲輸。豈謂筋骸之難強。衰頹彌甚。疢發動者兩三。災患相仍。意不如者七八。雖際飛龍之運。自甘退鷁之蹤。尙軫皇慈。曲從私志。旣假珍臺之佚。復聯書殿之榮。此蓋伏遇皇帝陛下。德合無私。功存善貸。擴大明于日月。獲望清光。拯微命于風波。少安散地。示蓋帷之罔棄。俾棧豆以知歸。臣敢不益佩弦韋。自親藥石。老馬或知于道路。固絕望于馳驅。犁牛無用于山川。第服勤于耨耨。誓堅晚節。靡墜素風。

太上皇后賀牋

臣某言。伏觀詔書。光堯壽聖。憲天體道。性仁誠德。經武緯文。紹業興統。明謨盛烈。太上皇帝。聖壽八十。皇帝。聖壽八十。皇
帝。帥羣臣。詣德壽宮。加上壽聖。齊明廣慈。備德太上皇后尊號。冊寶者。聖皇紀壽。益上萬年之期。神母齊
徽。方隆四海之養。禮行當寧。慶及敷天。恭惟壽聖。齊明廣慈。備德太上皇后殿下。厚德承乾。柔明媲日。邁
周郊之胥宇。輔成再造之功。踰漢掖之練衣。同膺難老之貺。載申顯號。允屬昌辰。日居月諸。共仰西池之
宴。天明地察。更占南極之祥。臣濫秩祠官。阻趨魏闕。觀大父母。人倫夙正于乾坤。有聖子孫。國祚永符于
箕翼。

皇后賀牋

臣某言。伏觀詔書。加上太上皇后尊號。冊寶者。慶集親庭。掩漢唐之盛事。祥開壽歷。紹堯舜之高年。喜溢
寰區。光生典冊。恭惟皇后殿下。化行恭儉。德茂慈仁。肅陰教于中闈。會朝惟謹。奉常珍于西內。左右無違。
穆卜柔神。助成緝禮。施于孫子。嚴青宮而致綠車之遊。燕及皇天。贊玉卮而集瑤池之上。臣猥叨祠秩。阻
綴廷紳。稱萬歲之觴。重霄在望。仰三朝之會。率土馳誠。

代湯丞相母夫人賀中宮牋

迎嗣歲之嘉祥。母臨萬國。正長秋之顯號。婦順兩宮。喜動宸闈。歡均寰宇。恭惟皇后殿下。體參坤厚。德配
離明。慶久襲于勳閔。本塗山之自出。譽夙彰于朱邸。符媿納之來釐。果觀樟衣。進膺寶冊。奉燕禩之文韜。

宜百斯男。躬靈館之懿箱。俟三之日。妾叨榮盛際。就養私庭。王化所基。方仰自家而刑國。人倫既正。敢忘教子以事君。

南澗甲乙稿卷九

狀

看詳學事申狀

看詳國史院具到典故。元符二年。詔諸路選監司一員。提舉學校。仍知通專一管幹。即係自祖宗以來。至是方委監司。知通提舉管幹學校。並未入銜。後至崇寧三年。蔡京用事。欲變天下學校。盡爲三舍。始置諸路提舉學事官一員。以爲監司。大觀間。修入三省法。諸州通判並稱管幹學事。大中大夫以上稱提舉。武臣知州不帶。及宣和三年。徽宗皇帝已詔罷天下三舍。止令太學以三舍考選。諸路以科舉取士。諸路提舉管幹文字。並皆罷訖。至紹興十三年。因權發遣建昌軍李長民。以外郡小臣。佞悅秦檜。謂和議旣成。儒風復振。欲令知通令佐依舊帶提舉。或主管學事結銜。以示聖朝偃武修文之意。遂復從之。紹興十六年。諸路提舉學事。委轉運司。有出身官一員兼領。俱無出身。即委從上一員。亦不專置提舉學事之官。稍如元符舊制。而知通令佐入銜。猶用蔡京之法。殊非徽宗皇帝宣和三年罷之之詔也。竊緣州縣與崇學校。政事所先。守令專管。亦爲本職。若依元符及宣和故事。止令監司一員兼領提舉學事。而守令等專一管幹。並不入銜。始爲至當。今來知州縣旣有通任武臣去處。則一州一縣之事。無所不當預者。兼元初繫

銜係以管幹爲名。亦是措置錢糧。修飭學舍。振舉法令。招集生徒之類。卽非干預講說考校之事。若令武臣守令。依文臣例入銜。亦足以責其應辦學校。不至闕誤。更乞朝廷詳酌施行。

看詳都轉運使申狀

檢准國朝會要。端拱元年。以右諫議大夫樊知古爲河北東西路都轉運使。自是遂以爲例。應侍從官除轉運。皆爲都轉運使。有以兩路爲都轉運使者。卽樊知古。河北東西路諫議大夫集賢院學士李迪。龍圖閣待制范雍等爲陝西都轉運使是也。累朝除授不一。其任侍從官。則不問兩路一路。並爲都轉運使。紹興初。向子諲以待制任兩浙都轉運使。趙子直以雜學士任江西都轉運使。係差第三任轉運使資序人。諸路轉運使係差第三任提刑資序人。諸路轉運副使係差第二任提刑資序人。若資序未及。卽帶權發遣字。或任大卿監。有除轉運使。別無任侍從除轉運使者。今來若依典故。卽合以侍從官任都轉運使施行。

論田畝敷和買狀

本州先于淳熙五年三月十二日。准轉運副使吳修撰牒。尙書省劄子。戶部申都省批下。新知鄂州真殿撰奏陳。乞將經界已定田畝物力等則。逐畝均敷和買。二月二十七日。三省同奉聖旨。先令吳淵行下兩浙路州軍。仰守臣同所屬知縣。博詢民情。究見利病。如今來臣寮奏陳。經久可行。從本司審度。條具申尙書省。劄付當職。當職照對得臨安府富陽縣措置。已將第五等物力一十三貫已上。均敷和買。

已得適中。并據本司簽廳相度。將諸縣五等物力。比附富陽縣所行。以十分爲則。捐出末後一分作下等不敷外。其餘九分並行均敷和買。牒州從長相度。經久可行條具。供申州司備錄。行下諸縣相度。供申去後。次第據諸縣申到。內義烏縣自經界後。從第一等。止五十貫物力。并金華、蘭溪縣各四十貫。及永康、武義、東陽、浦江縣各三十貫以上。敷納和買。至今經久。并無詞訴。若依富陽縣例。敷止一十三貫。及轉運衙簽廳議以十分爲率。捐出一分不敷。餘九分並行均敷。竊慮優減上戶。卻致歸在下戶。事體偏重。或生詞訴。具狀回申去訖。至今年三月十七日以後。再准轉運衙牒。准行下尙書戶部符。據婺州蘭溪縣王宗等四名。狀理本縣自四十貫文物力起敷和買。豪猾肆姦。多立詭名。並以四十貫文以下立戶。不用科役。竊見臨安府富陽、錢塘仁和縣、嚴州壽昌縣。自物力一十貫以上。並起和買。卽無詭名等弊。恭覩淳熙五年。莫殿撰申請正令。所陳乞送轉運司。一就相度。供申牒州遵依。已降指揮守臣。同其餘縣分知縣。博詢民情。究見利病。指定供申。又准轉運衙牒。准行在尙書戶部符。准都省批下。權知真州陳通直劄子。陳言。乞將人戶田產物力各隨畝步數均出和買。又都省批下。權發遣南康軍吳諒夫劄子。奏豪富之家。皆爲詭名夾戶。規避和買。乞以和買如夏稅之法。敷于步畝。使產多者和買亦多。產少者和買亦少等事。戶部勘當。緣已有前降莫殿撰申請指揮。令下轉運使。詳本官所陳。及已降指揮。一就審度。經久可行。條具保明。供申朝廷施行。牒州施行。具博詢民情。究見利病。一就從長相度。經久可行。條具供申等事。須至供申。

右州司所准前項指揮。本州今與州縣官博詢民情。講究利病。相度莫嚴。撰陳通直。吳知軍申請。及蘭溪縣百姓王宗等狀。若將物力十貫或十三貫以上。並起和買。除措最末一分不敷。以防詭戶之弊。竊緣和買之法。止謂物力富實之家。可以科買。若併及小戶。卽是增添夏稅。深慮詭戶夾戶之弊。未能頓革。而貧民下戶。先被科擾。且以一縣物力論之。統計一萬貫。上三等五千貫。合出和買。下四等五千貫。不出和買。今若都以上二等合出和買之數。均之下四等。則是上戶反減舊數。下戶便添輸納。其不可一也。若以田產只計頃畝。起收物力。每畝以若干爲則。至若干畝卽出和買。緣經界起稅。各有等則。以田畝論之。有水田。有平田。有高田。以園地論之。有平桑。有山桑。有陸地。有茶地。有竹脚。有柴權。難以一例便計。頃畝均敷。必欲各等隨則分定。則是又行經界。情弊愈多。爭訴不少。未得了絕。兼又坊郭營運房廊。上亦有物力。每至若干。卽起和買之數。如此均敷。則戶眼倍增。丈尺繁碎。縣道戶長。催科益難。其不可二也。且以本州七縣。目今所行。亦自不同。金華。蘭溪。則四十貫以上。義烏。縣則五十貫以上。永康。武義。東陽。浦江。則三十貫以上。始敷和買。行之既久。並無詞訟。止有蘭溪一縣。王宗等四人。今來投狀。尋喚上詰問。並契勘得蘭溪縣物力。共管物力一百九萬五千四百四十二貫。其合起和買四十貫以上。人戶計五十四萬二千三百貫。其不起物力人戶。計五十四萬六千七百五十一貫。卽是上戶少于下戶。物力錢三千四百餘貫。竊慮日後下戶日增。物力不等。今議欲以一縣物力算定。須上等起和買。人戶物力錢。與下等不起和買。人戶物力錢。各要數目中分一般。每三年一次比算。如遇下戶物力多于上戶一分以上。卽別立物力貫數。均定和買。

次以十貫上下爲率如蘭溪縣元係四十貫以上卽合減作三十五貫上下起數庶得關防減免之弊不至走失上戶物力常得均平卽難以限定十貫十三貫之比卻致優減上戶均在下戶永遠爲害或見今上戶物力與下戶物力數目適已相等卽合依舊更不更改仍乞朝廷申嚴詭戶之禁立限百日許其首併限滿不首許人陳告以所告田產給之坐以違制之罪其官戶所置田產偶因前後官稱不同亦令改正若蒙詳酌依本州所請則上戶物力不至走失其逐歲和買不過舊數而下戶物力尙有一半惠及小民比之只指一分大段不同加之詭戶旣嚴必罰無貸自然可以潛消弊倖不必紛紛以從一切論之實爲允當謹具申轉運衙伏乞詳酌備申朝廷施行

措置武臣關陞狀

今月二十三日準尙書省劄子大小使臣關陞從軍理任必以戰功爲別其從軍者必以實歷爲先稍用薦舉以異于戰功之士等事緣有未盡送某限三日措置申尙書省今具措置下項須至申聞者

一在法使臣兩任監當實及六年滿替年三十以上者到部方與關陞親民昨因紹興九年四川宣撫使申請隨軍大小使臣理爲資任自給到吏部理任差帖印績日實及六年許免到部就任關陞親民依舊從軍使喚無朝省付身以二日當一日緣有功人與無功未有旌別欲乞從軍理任後曾立軍功轉官實及六年依舊許行關陞外其不曾轉官人亦合依無付身例以二日當一日

一從軍使臣若在軍未成關陞考任因離軍任州縣諸司差遣自依外任通理關陞外其偶緣老病不堪

披帶揀汰差充不一務窳闕合行優假欲乞免行關陞止與通理考任依格陞注差遣

一非從軍在外使臣舊法係合實歷六年乾道七年申請並于歷過考任內須要實歷州縣職事或諸司官屬一任二考方許通理前後任關陞竊慮一能更歷事任欲乞並要實歷州縣職事或諸司官屬兩任

四考通理六考方行關陞

一宗室許歷外任正欲更練職事近來多注嶽廟差遣習爲廢弛緣乾道元年已有復置宗室監當釐務窳闕欲乞亦要實歷州縣職事或諸司官屬一任二考通理四考方行關陞

一武臣薦舉狀止有陞陟任使一等自來僅當功分自淳熙元年于薦舉武臣陞陟狀內立一兩紙添作舉充親民任使稍爲優異欲乞除從軍入外應武臣六考內並要陞陟舉狀二紙內舉充親民一紙欲使關陞

一歸正歸朝使臣者不係從軍并釐務差遣既無職掌合與優假依揀汰人例免行關陞止令吏部通理所歷考任依格陞注差遣

一所有軍班吏職出身及進納人等關陞已有專法指揮者並令依舊右謹具申尙書省伏候指揮

集議繁冗虛僞弊事狀

具位某等准尙書省劄子備坐監察御史徐翽奏到繁冗虛僞弊事七月二十三日三省同奉聖旨令侍從臺陳兩省官集議申尙書省某等照對本官條具事內有現行條法該載明備者止合有司檢舉申嚴

自不須集議外。有條法未盡。施行未備事件。今集議到下項。

一。中書天下之本。不可不清。自諸大郡倅。收爲堂闕。加以有川廣小郡。不在此限之文。守倅除授。益以不均。故有改官後。無一日考第。而得大郡倅者。有作縣以罪罷。而得廣中大郡者。其間腳色無瑕疵。或曾任繁難大縣。或諸司列薦人。往往或注列郡倅。或注諸司幹官。開僥倖之門。塞公平之路。長奔競之風。成朋比之私。其害莫大于此。臣愚以爲職事及監司。若大郡守。皆須宰執擇才進擬。其餘中下州軍及大郡倅。宜盡發還吏部。士大夫整會官職差遣。理雪罪名。凡于身計。並以通封狀子。遣人于都堂投之。一切私禮。悉令勿講。照對舊法。吏部知州軍運判員闕甚多。士大夫依資格注授。其經堂除者。號爲擢用。而在堂窠闕。皆是重地要藩。守貳選任不輕。士大夫亦以爲榮。至紹興初。舊法不存。止憑省記。猶以知州軍二十七闕。令吏部注授。盡爲堂闕。蓋吏部注授。則限以資格也。堂除則有不問資格者矣。然畏指議。防繳駁。其不問資格者。猶不常有。自淳熙二年。知州軍闕。盡歸于堂。而吏部更無知州軍一闕。以待孤寒資格之人。而又有川廣小郡。不在此限之文。人人盡可于堂。以望州郡。使吏部銓法。遂爲虛設。所謂川廣之郡。實亦未嘗分其大小。一例與之。此公議所以籍籍也。至于堂除通判窠闕。發下部者。僅十六闕。爾今來職事官等。若從吏部申請。悉遵舊制。諸在京職事。未至監察御史以下。履歷尙淺。供職未久。陳乞外任者。不得除監司。知州軍差遣。特旨除授。或資序已及者。不論。而不用限年除郡之格。則知州軍元係吏部窠闕。及川廣小郡。合還吏部。緣其間職事官等補外。卻有合陳通判之人。難以逐一降指揮。令吏部注授通判。合以堂

除通判處之。則堂除通判不可盡罷。乞自三省選定堂除知州軍通判若干員。關外餘關令吏都並依格法注授。亦足以息奔競之風矣。至于士大夫以通封狀。經都堂整會官職差遣。理雪罪名。凡于身計。亦是舊規。自合舉行。若私第一切不見賓客。恐無以審觀人材。詢訪外事。宜遵守淳熙二年指揮。大臣日見賓客。有妨治事。私第除侍從外。其餘呼召取覆等官。每日各止許接見一次。實爲允當。

一修葺城壘。調發軍兵。修造棟宇。皆官吏之職分。何有勞効。而特轉官資。又轉官者。或併轉兩官。進職者。或併進三職。尤爲僥倖。仕子雖不可裁抑。少嚴銓試之法。兩歲或三歲一試。兼聞近歲。至有代名入試者。仍須場屋更加嚴密。照對修城壁。築堤堰。營造屋宇。已有今年。臣僚起請。候經三年。委實堅固。方許推賞。正月十九日。奉旨令屬曹部置籍。訖宜令常切稽考。轉官進職。有濫賞者。御史臺察舉以聞。其三年內有損壞者。追降所進官職。若仕子銓試之法。兩歲或三歲一試。試期太遠。祖宗立法。每歲銓試。春秋兩次。今已併爲一次矣。十人取七。今已減爲兩人取一矣。去歲大吏奏薦文臣二百二十八人。武臣乃一千三百九十二人。前歲科舉特奏名進士亦三百三十八人。則文武仕子自爲不多。若更展銓試。則正奏名進士第五甲人赴銓試者。亦令又展二年。是陰殿其一舉矣。此不必議也。至武臣呈試。與銓試同。銓試自宰執子弟以降。皆不得用恩例幸免。呈試并戶部僱綱。承受權貨務號簿官。隨逐奉使。與接送館伴下官屬之類。資緣免試。此不可不革也。就使不習弓馬。亦當試以刑法書算。如人吏試補之比。其奉使出疆。雖曰稍

多。而文臣未出官人奉使所辟差者。亦不免銓試也。乞自今文武一例。不許免試。武臣累試不中。亦依文

臣限年四十許參部授殘零。在本等人名次之下。乃爲至當。其餘代名入試之禁。今年二月已降指揮。依吏部措置。先召保職官二員。委保正身。不是代名。入試日。責書鋪識認狀。特立賞格。重行斷罪。不須更用。簾試虛文。每歲更令有司常切申嚴施行。

一方今天下雖並侈靡。而輦轂之下爲最甚。四方來觀。歸而效之。惟恐不及。宜命多聞有識之士。編輯法令。而參之以禮。凡室廬車服冠婚喪祭燕饗餽遺。皆立爲定式。自成一編。如司馬氏書儀及諭俗書之類。頒而行之。但先治都城之內。風俗旣變。則四方無不從矣。照對淳熙三年十月十六日已降指揮。禁約奢侈踰制事件。行在專委臨安守臣嚴切禁止。斷在必行。如有違戾。令御史臺覺察彈奏。先次將守臣重行責罰。其犯人依條斷罪。追實有官人。取旨施行。外路州軍依此。仍委監司覺察按劾。多出文勝曉諭。緣銷金鋪翠服用僭侈。自有禁令。其屋宇器皿首飾。下至鞍轡繖轎。皆有定制。非不嚴切。然風俗侈靡。未能類革。竊見前代及本朝。皆有誠諭風俗之詔。若特降明詔。俾四方士大夫之家。欽承旨意。務遵禮法。皆事純儉。則閭巷小民。久當自化。風俗其何患不易哉。右謹具申尙書省謹狀。

又

准尙書省劄子。備坐監察御史齊慶胄奏到繁冗虛僞弊事。七月十三日。三省同奉聖旨。令侍從臺諫兩省官集議。申尙書省。某等照對本官條具事內。有現行條法該載明備者。止合有司檢舉申嚴。自不須集議外。有條法未盡施行未備事件。今集議到下項。

一。塞上書捧香之門。嚴吏職門客之格。凡曰給使。不許其貨賣。凡曰異姓。必覈其服屬。照對上書補官。係朝廷一時特恩。卽不常有。吏職補官。自有逐司立究年限條格。宰執并兩府使相。遇大禮。許奏門客。係登仕郎。不理選限外。大禮聖節生辰。太上皇后殿。奏補使臣各四人。皇后殿各二人。陳乞回授與本家門客。并進奉人。逐時特降指揮。門客進士。補將仕郎。主管進奉人。卽謂之捧香。並係舊法。亦無可議之數。緣在法。諸后妃。諸王公主。內命婦。蔭補親屬。如父祖曾仕文資。謂朝奉郎以上。或身曾得文解。免解同。而願就文資者。聽餘並于班行內安排。其門客進士。卽非親屬。但以進士之名。直授文資。物議以爲反優于有服親屬。若令上件門客。如曾得文解者。聽乞文資。方爲允當。其給使補官。係宰相執政官。反依執政官合得入流減年之人。淳熙三年十二月十六日。已降指揮。並依舊法。緣今來所請。係謂以賄賂得之者。乞令法寺檢坐條法約束。如今後有犯。務在必行。其異姓補官。淳熙二年九月二十八日。已降指揮。臣僚奏薦異姓恩澤。並畫出中外所親姓名服圖。及升朝二員。委保繳連奏狀下部驗實。緣內命婦以上。奏補異姓。旣不召保。若令被蔭人供具服圖。連家狀繳奏。亦爲允當。

一。重祠祿之命。照對陳乞宮觀。已有立定條法。知縣資序人。不許過兩次。知州資序。年六十以上。更許兩次。知縣資序以下。許陳乞嶽廟一次。郡守年七十。聽自陳乞宮觀。知縣縣令。審察不才。許授宮觀嶽廟。現任通判。癯老疾病之人。許差宮觀。知縣巡尉。癯老不職。許差嶽廟。已有累降指揮。自合遵守。若通判已下。現任癯老疾病不職。與差宮觀嶽廟者。更令將在任歷過日月通理。宮觀嶽廟之任滿罷。庶得不。至虛費。

祠廩少。隆于合格宮觀嶽廟之人。

一、罷添置之員。有不釐務通判、陳乞改爲釐務者。軍伍之間。既有統制統領。又有將副訓練。而額外准備之名。一切省之。照對不釐務員闕。宗室戚里自有定制。除歸正歸朝不釐務人。乾道八年指揮許隨人材量試以事。委有成效。保明奏舉。與改釐務差遣外。欲乞自今宗室戚里等不釐務。窠闕不得陳乞。改作釐務。其才堪釐務者。自令別行除授。釐務窠闕。所有諸軍正額統制統領訓練將副官以上。有額外准備之名。卽不見得自來。係以軍分。如何添置。合與不合減省。乞從樞密院行下三衙主帥諸軍都副統制。公共措置。委合如何施行。

一、汰冗冒之兵。州部或以衰殘羸弱之輩。僅充其數。或以逃亡走死之額。權募游手。或一名而兼二名之糧。以使其私。或禁軍而隱于廂軍之額。以避更戍。照對招收不及等。仗冒承逃亡。巧作名色。冗占差出之類。各有條法。約束指揮。並許人告。科以違制之罪。宜令監司帥臣常切覺察。嚴行科罪。但州郡禁軍。縣寨士軍。間有招填未足之數。卽合催促招令及額施行。

一、覈補授之詐。進士特奏。有就人父祖冒而承之者。仕子補蔭。有妄通譜系。遷移服屬。詭而奏之者。號爲女之夫。實未嘗娶其女。曰異姓之親。實未嘗有姻婭者。照對上件自有立定條法。召升朝官委保。及州軍等處結罪保明。所保不實者。與犯人同罪。近來朝廷有孫恩、趙鼎、姚康朝等。冒受行遣。宜令有司取所犯案。連抄節錄板。行下州軍。常切覺察施行。

一。豁虛文之籍。商稅房園錢帛雨水之帳。類非確實之數。又如應在之錢穀。上下舉知其無有而載之。赤歷常占虛數。逃亡之苗稅保伍。既不可以備償。而載之版簿。照對諸色帳狀。州委司法轉運司置主管帳司官。而戶部總于在曹。通于金部。會于比部。蓋自國朝三司以來。有此所以勾稽檢轄。不可暫廢。如應在錢物。並是州部經常之數。間有名存而實廢者。緣監司以應在虛數。妄行剗刷。指爲贏餘。是致州郡有受弊去處。但令監司不得以應在虛數剗刷。此弊自除。逃亡苗稅。亦是州縣常賦之數。其不可去者。恐失元管稅額。以待流移之人復業也。緣州縣不曾倚閣。將逃戶稅賦。便攤在其他典買得業人戶下。或勒令催科。戶長乃着保抱納。是致民戶有受弊去處。但令州縣覈實逃亡稅苗。合行倚閣者。依條倚閣。則此弊自除矣。

一。抑搢紳奔競。照對奔競之風。從古爲患。未仕之覓舉。已仕之干薦。自媒求譽。廉恥道喪。此蓋未易以刑罰禁戢。惟在獎拔恬退之士。有以激勵而消之。昔仁宗皇帝患搢紳奔競。諭近臣曰。括退守道者旌擢。則躁求者自當知恥。是時宰相文彥博。宋庠等。舉張環。呂公著等。皆被擢用。王旦爲宰相。以張師德文學高第。兩至其門干謁。即不肯遽用。爲知制誥。其言曰。以戒貪進。激澆薄故也。仰惟聖朝。但得遵用仁祖之訓。而羣臣悉守王旦之言。以裁抑奔競。亦何患有不悛改哉。右謹具申尙書省謹狀。

集議前宰執舉官奏狀

臣等竊惟國朝始制選人改官之法。自大中祥符之年。中外陞朝官。每歲皆得舉薦。置籍中書。嘉祐四年。

仁宗皇帝乃召諸路帥守監司各舉所部人材。而前兩府臣僚則許通舉內外。不問所部。神宗元豐五年遂定。曾任宰相執政官歲舉改官五人。載在令甲。至今行之。誠以天下之士入仕之初。多爲選人。改官之後。寔致朝列。以三歲科舉。與夫郊祀奏補之數均之。遞歲改官之員。不啻裁減其半。若不設薦舉。則才能無以著見。若不限員數。則進取無以節抑。又慮帥守監司有所知而未盡。前宰相執政官者。天子嘗與之共天下之政也。故委以求天下之才。當時詔旨。正謂才行之士。尙有遺滯而已。然前宰相執政。雖得不拘內外薦舉。而所舉之人。又須兼用所部職司一員。始得磨勘改秩。此祖宗舊章。參考互察。最爲嚴備。以成一代之制也。看詳臣僚申請。欲令前宰相歲舉一人。前執政兩歲薦一人。賜以召對。卽行改秩。而罷其愚謬。以議舉者之罰。臣等以爲歲貢而有定員。所以爲常法。而闢平進之門也。限以舉者五人。則足以參考互察矣。召對而改秩。此人主之異恩也。若臣下得以歲舉焉。又不限以五人之數。則獨薦而改官者。將無歲不有。其可以爲異恩乎。雖曰罷其愚謬。竊恐罷者之少。未若改者之多也。夫以選人改官之微。在仕進之階。其事爲甚重。故引見于廷。欲示恩出于上。猶進士唱名命官之比。而必待人主登之殿陛。自擇其才。則是屈至尊而下行銓選之事。非特舉者之不足信。百官有司尙誰信哉。至于薦舉之間。干託請求之弊。法令具在此。諫官御史司公議者所宜察也。故臣等以爲姑仍舊法爲便。乞聖慈特賜詳酌施行。

蔡洗等集議安南國奏狀

臣等具位。准尙書省劄子。安南國李天祚追贈及其子李龍翰合襲封事。五月十四日。三省樞密院同奉

聖旨令侍從臺諫兩省官同共議定聞奏者。右臣等竊惟國朝故事。待蕃夷之禮。最爲詳備。若高麗嗣子。則待其請命。然後封以爲高麗國王。若占城、三佛齊、閩婆諸國。則待其入貢。而遂以爲本國王。惟是奉命安南。甚有次第。其始嗣立。則封交趾郡王。中間數年以後。則封南平王。及其身後。則追贈南越王。自太祖太宗至于累朝。必加二命。未之或改者。蓋以安南本交州內地。實吾藩鎮。因仍世襲。使護安南一道。非他外夷自有土地。人民不盡臣之比也。所以漸次封爵。時示恩榮。其鞮縠制御之道。不得不然。今來李天祚既薨。其子龍翰嗣襲。自合遵用祖宗舊章。以行封爵。恭惟聖慈淵慮。乃使臣等定議。豈以淳熙元年。曾以天祚爲安南國王。已有國名。疑其禮亦異數。故耶。臣等聞朝廷昨以安南國王命天祚者。初非其國抗章有請。特以貢獻馴象方物。守藩歲久。錫之此名。以寵天祚而已。安南本都護之稱。非可名國。而南越之封甚大。自漢以來用之。則天祚旣沒。宜用典故。追贈南越王可也。其子龍翰。雖云嗣襲。然未有功勳。亦宜只遵典故。所加節鉞官稱。初封交趾郡王。庶爲允當。若朝廷謂已曾錫之安南國名。不敢虛設。則宜去其安南都護。稍加以爲知安南國事足矣。蓋高麗嗣子。每次亦稱權知高麗國事上表。此其據也。彼或祈乞。但令廣西弔祭監司明諭此意。候他時職貢不闕。續當賜安南國王真命。不復更封南平王矣。如此。則昨所賜安南國名。姑以易南平王之號。猶須身後始得封爲南越。上不失祖宗漸進之意。下足以盡鞮縠制御之道。而于我之事體無所虧損。彼之名稱無所鑄改。似爲可行不易之論。若便欲使其嗣子襲封王位。而褒贈天祚。別以師傅之官。且加美諡。則是朝廷自變其禮。而不以藩鎮小夷待之。驟與外國諸蕃一同。不

知既襲王爵數年之後。卻加以是何恩數。其將遂以南越王與之乎。此不可不過爲之慮也。臣等所議如前。惟聖主擇焉。謹錄奏聞。伏候敕旨。

准三省帖子。今月初一日。赴都堂集議。右某等近奏聖旨集議安南國追贈襲封事。已連書具奏。緣某等所議。並是考據典故。委曲詳備。別無未盡事理。所有國名。係已帶知安南國事。卽非遽有奪其王爵。欲俟他日職貢不闕。然後加封。庶使外夷明知祖宗以來封爵次第。不至別有覬望。所議如前。謹具申三省樞密院。伏乞照會。謹狀。

辭召赴行在狀

右臣今月十一日。准尙書省劄子。正月十七日。三省同奉聖旨。臣某召赴行在者。臣欽聞嚴命。悚懼無所。伏念臣資性疎直。學識淺陋。荷陛下拔于衆人之中。躋實從班。曾不能効尺寸之功。圖報聖恩于萬一。昨者出守輔郡。繼移閩嶠。二年之間。罔有善政。惟知奉行法令。未至曠瘼而已。然臣齒髮寢衰。心志不逮。比常冒賈危衷。祈就閒散。天聽高遠。尙闕俞音。方欲少俟兩月。再伸誠懇。敢意遽蒙收召。俾觀闕廷。仰惟聖神念舊。未忍棄捐。在于愚分。實深驚愧。伏願皇帝陛下。察臣癯瘁。戒在貪榮。憐臣朴忠。非有避事。敷求名德之彥。使造內朝。檢會臣前來奏請。畀臣在外宮祠一次。下以全微。臣易退之私義。上以副容主難才之公心。臣則萬幸。臣除已將建寧府事交割以與次官。一面起發前去信衢州。以承聽候。指揮外。謹錄奏聞。伏候敕旨。

辭起軍轉官狀

臣伏覩進奏院報。閏九月二十八日。樞密院奏兩浙福建江東路諸州軍起發禁軍士兵。赴逐處教閱。守臣以人數多寡。參酌推賞數內。臣係奉聖旨特轉一官者。臣欽奉恩命。驚懼無所。竊惟國朝軍制之密。凡曰禁兵。雖募于方州。而皆籍于右府。故守臣號爲知其軍事而已。是州郡之兵。實環衛之旅。寓糧者也。聖神御宇。屬意武事。近年以來。又命選擇。日加練閱。紀律明備。虎符旣下。津置起發。守臣職也。道途無虞。部押之官。蓋受賞矣。聖恩優渥。併及臣等。願臣何功之有。遽此僥冒。況昨降指揮。止俟春暖。類當發還。若一二年閒。再或成役。則爲守者。動有希覬之心。臣恐自爾。賞過乎與也。方陛下綜覈名實。大明黜陟之秋。如臣守州。叨備侍從。義當體國。內省無庸。豈敢虛受。兼臣昨因降秩。歲月未滿。驟有遷轉。尤不遑安。欲望聖慈。留此以勵軍中。効命之士。推此以待天下立功之人。則臣區區愚忠。受賜一也。所有臣特轉一官恩命。乞不施行。不勝幸甚。干冒宸嚴。臣無任瞻天望聖。激切屏營之至。謹錄奏聞。伏候敕旨。

辭免奉使回轉官狀

右臣准尙書省劄子。以臣奉使回程。四月二十三日。三省同奉聖旨。轉一官者。臣仰惟聖神在御。務廣至仁。聘問之交。是爲常禮。如臣不肖。叨預從班。曾何補于事功。實坐糜于歲月。暫將明命。臣之職也。初無專對之勞。可冒信賞。伏望皇帝陛下。曲回天造。特寢誤恩。察臣粗守樸忠。憐臣素無矯僞。姑以舊典。推以官屬。俾臣且仍故秩。以効尺寸。庶稍安于愆分。期不負于聖知。所有恩命。臣未敢祇受。臣無任祈天望聖。激

切屏營之至。謹錄奏聞。伏候敕旨。

辭待制與郡狀

臣恭聞恩命。踟躕靡遑。伏念臣以寒遠之蹤。荷聖神之眷。擢實從班。俯仰再歲。技能短拙。曲賜并容。議論迂疎。每蒙獎與。雖自叨逾過甚。筋力弗任。已具丐閒之章。方欲朝夕上列。敢期天造。尙使治民。碎骨糜軀。未知報塞。惟是西清。次對之職。禮秩優厚。守符重寄。懼弗克堪。伏望皇帝陛下。推天地從欲之仁。擴日月必照之施。憐臣粗守樸忠。素無矯僞。收還職名之命。改授一在外宮。觀差遣。庶幾愚分稍安。免致清議。臣無任隕越之至。

辭龍圖閣學士狀

右臣准尙書省劄子。八月十二日。三省同奉聖旨。除臣龍圖閣學士與郡者。臣聞命過優。震懼無已。伏念臣猥以凡庸。久玷從列。蒙聖知爲甚異。荷恩渥爲至隆。玩歲愒日。尸位素餐。自知旣明。冒昧有請。陛下天地父母之仁。未忍捐棄。倘欲徇其私志。畀以承流宣化之任。在臣愚分。已爲叨逾。惟龍圖祕職。首冠西清。稽之故事。則非賢達。而罔居質之近制。則須功勤。而乃授。豈臣猥瑣。所可克承。至于郡寄。臣欲自効。則不敢辭。伏望皇帝陛下。洪覆無私。大明旁燭。收還宸渙。以穆師言。或乞依昨降指揮。檢會臣前來。除臣日職名依舊帶行。庶幾不至過有僥倖。以明聖朝選授之公。以全下臣知止之義。臣無任祈天望聖。激切屏營之至。謹錄奏聞。伏候敕旨。

辭除權吏部侍郎奏狀

右臣伏准尙書省劄子。二月二十五日。三省同奉聖旨。韓某可除權吏部侍郎。日下供職者。臣聞命震驚。罔知所措。伏念臣稟資愚戇。賦分奇窮。五叨宰掾之華。九閱歲躔之換。比更憂患。尤覺病衰。逮茲隸職之期年。不勝曠官而惕日。尤欲自祈于遠外。敢期忽被于褒遷。揆之私誼。則非宜。質之公論。則未稱。况准詮部。尤號劇曹。倘微通鍊之才。曷任甄平之寄。伏望皇帝陛下。曲垂淵鑒。俯亮危誠。別求當代之俊髦。以副一時之器使。顧天之切。請命惟期。臣無任祈天望聖。激切屏營之至。謹錄奏聞。伏候敕旨。

再辭奏狀

右臣准尙書省劄子。以臣辭免除權吏部侍郎恩命。奉聖旨不允者。臣以疎遠迂陋之質。家世荷國厚恩。今蒙陛下拔擢。俾列貳卿。在臣么麼。可謂榮遇。不當固有辭避。重念臣才力不能逾人。學問無以異衆。自還宰士之例。復承詢掖之虛。狂言屢發。而每被矜容。孤蹤久滯。而尤加軫惻。然羣彥方疑于去就。而微臣獨冒于遷除。雖夙恃于聖知。恐難免于衆議。況班列之中。多有在臣上者。遽茲超躡。尤不遑安。伏望皇帝陛下。廓天地之量。迴日月之明。察臣粗守樸忠。憐臣素祈靜退。收還成命。改畀真材。使之宣力于四方。尚能仰答于鴻造。臣無任祈天望聖。激切屏營之至。所有恩命。未敢祗受。謹錄奏聞。伏候敕旨。

辭免除吏部侍郎狀

右臣准尙書省劄子。五月十二日。三省同奉聖旨。韓某可除吏部侍郎。日下供職者。有命自天。措躬無地。

伏念臣賦才甚下。造學不優。一辭州縣之勞。四冒臺省之入。孰云末路。誤簡聖知。敝流品于三銓。粗叨滿歲。暢威靈于萬里。僅止踰時。尺寸靡長。毫分何補。徒懷中憤之激。妄意事功之期。丹陛獻言。但爲昨日。黃扉受寵。乃不崇朝。雖大君欲礪于庶工。然微臣敢尸于異數。伏望皇帝陛下。推此施以待天下豪傑之士。擴此意以收海內智謀之臣。將力置于中興。宜坐屈于羣策。若慮獲伸于一得。則榮名何在。于九遷曲軫危衷。姑仍舊列。惟有忱辭之自竭。尙祈淵聽之可回。庶俾厚恩。不爲虛受。臣無任祈天望聖。激切屏營之至。謹錄奏聞。伏候敕旨。

辭除權吏部尙書狀

右臣准尙書省劄子。五月二十二日。三省同奉聖旨。除臣權吏部尙書。日下供職者。臣聞命自天。措躬無所。伏念臣去國雖更于再歲。承流尙玷于兩州。課其治狀。則無以逾人。省其廉隅。則第知守己。夙被聖神之眷。躋躋侍從之聯。豈其記憐于九重之中。遂蒙收召于千里之外。內朝賜覲。粗陳狂瞽之言。天聽不違。曲賜褒嘉之訓。竊懷尺寸區區獻忠之意。敢有絲毫汲汲幸進之心。乃奉殊恩。寵班常伯。矧是三銓之長。實司羣吏之成。雖往歲暫冒于攝承。而一旦遽膺于遷陟。願賢能之在列。且雋傑之尙多。揣其分義。則非宜。稽之公議。爲可畏。伏望皇帝陛下。俯全舊物。特軫鴻慈。還渥渙于誤頒。東真才而擢任。有如愚陋。俾以退閒。庶幾微臣志盡自知之明。仰副官朝官無虛受之義。臣不勝願幸。所有恩命。臣未敢祇受。謹錄奏聞。伏候勅旨。

辭吏部尙書狀

右某准尙書省劄子十一月二日三省同奉聖旨韓某可除吏部尙書日下供職者臣聞命震驚罔知攸措伏念臣稟資駑下賦性拙疎技能不異于衆人問學無聞于當世自鑄周行之列親逢上主之興攝詞命于西垣薦承容獎濫銜衡于文部益荷聖知承流兩郡而初無撫字之功錫命九關而復被招徠之寵逮膺常伯曾未踰年徒以世受國恩幼循家訓服其職業之間者罔敢避怨獻于聰明之下者每務盡忠雖乾坤之大無所不容然螻蟻之微退輒自懼豈期冀幸乃曾爲異惟念臣早歲驅馳固有功名之願中年遭遇實無爵祿之懷僞臣言得用于明時則臣志已據于平日至于假臣之過分適以重臣之不安伏望皇帝陛下曲軫至仁特收成渙俾臣姑仍舊職亦足副于使令容臣少效微勞庶以逃于謗戾所有恩命臣不敢祗受臣無任祈天望聖激切屏營之至謹錄奏聞伏候敕旨

薦張竑周垌狀

具位准吏部牒節文四月三日同奉聖旨令侍從臺諫兩省官參照資序差格不以外雜舉監司郡守歲各五人保舉官及五員以上列銜共奏明言所舉人有何政績才術八月七日三省同奉聖旨保舉官限五員以上列銜共奏竊恐各有所知難以同共論薦可依元議亦聽獨銜歲舉監司若郡守共

貳人者

右臣伏觀朝奉郎大理正張竑疏通明敏才術有餘昨任義烏知縣卽有能聲本路監司薦聞審察除監

登聞檢院。改差通判信州。權南康軍。備著政績。又爲諸司列薦。特轉一官。且被召命。蒙恩授以司農寺丞。繼遷今任。雖理財治獄。悉有可觀。殊未究其所長。又伏覩奉議郎主管台州崇道觀周垌。性資介直。臨事嚴明。昨知弋陽縣。本縣寄居豪強。例不肯輸折帛錢。脅持官吏。只納本色。垌一切摧抑。不避衆怨。舊弊悉除。繼移祁門。休寧兩縣。催科有法。辦集先期。所斷獄訟。人服其平。並無翻訴。臣時爲轉運判官。親見其事。曾任隨州通判。經理邊郡。深究利病。特以流寓家貧。入就祠祿。貳人者皆可任監司。或繁劇郡守。如蒙朝廷擢用。後不如所舉。臣甘被欺罔之罪。謹錄奏聞。伏候敕旨。

薦崇安建陽兩知縣狀

具位檢准淳熙元年八月二十二日勅。臣僚上言。命監司郡守精察所屬縣令。留意民事。政有實迹。公共論薦。三省同奉聖旨。依奏者。

右臣等照對本府諸縣內。崇安、建陽最爲衝要。民頑吏猾。前後知縣持身不謹。馭下無術。少有終任。不致訴訟。其間留意民事。政有實跡。應得前項指揮者。臣等不敢隱默。臣伏見承事郎知崇安縣事王齊輿。遇事敏明。律己廉恪。斷決訟牒。無不中理。本路州縣。皆重鹽綱。以爲歲計。齊輿自到任。搬運鹽綱。措置出賣。深村窮鄉。皆賣官鹽。而勸諭有方。路無科擾。發納本府軍名及諸司錢物。悉皆了辦。募到上戶。興修水利。開成星王陂堰。灌溉民田四千餘畝。皆是棄戶樂然雇夫。不曾費用分文官錢。及強有數畝。又伏見奉議郎知建陽事黃中立。臨政寬和。而事皆無闕。禁制盜賊。摧抑健訟。了納前官欠負。椿辦逐歲支費。計置錢

本搬運鹽綱小大並舉。本路諸州軍今年起發禁軍。士兵無不經由本縣。中立去替有日。而能預備錢糧。批請券食。日有支費。百色應辦。悉無科擾。其王齊與黃中立二人。委有上件政績。在任滿替。並無縮繫。不了事件。臣某認叨郡寄。稽考並皆詣實。臣自得。係前知建寧府事。今來復領漕計。臣儻係在本府置司。公共審究。備見不誣。敢具奏聞。伏望聖慈。特賜旌擢。以爲能吏之勸。如逐人後犯入己贓。臣等並甘同罪。謹錄奏聞。伏候敕旨。

舉蘇嶠自代狀

具位某准令。諸侍從授訖三日內。舉官一員充自代者。右臣伏覩右朝奉郎尚書吏部員外郎蘇嶠。議論堅明。操履純正。名臣之裔。綽有典刑。臣實不如。舉以自代。謹錄奏聞。伏候敕旨。

應詔舉所知狀

具位某准尚書省劄子節文。詔臺諫侍從。各舉所知一二人。疏其事實。可以充是何職任。八月二十三日。三省同奉聖旨。依奏者。今具如後。一左奉議郎前權發遣信州軍州事王師愈。曾任潭州長沙知縣。委有政績。諸司列薦。繼爲嚴信兩郡。戢吏愛民。不擾而辦治。持論疏通。恥爲無用之學。堪充郎官以上職任。一右宣教郎新差通判隨州軍州事周炯。曾任信州弋陽知縣。摧抑豪強。不避怨謗。繼移祁門休寧兩縣。持身廉介。遇事嚴明。吏畏而民愛。催科並依省限先足。堪充郡守監司職任。一左文林郎兩浙路轉運司幹辦公事崔敦詩。服勤州縣。不廢古文。所撰國朝饒歌鼓吹曲。筆力雄健。有唐柳宗元風。又嘗爲資治通鑑

原书缺页

原书缺页

